

Josué

Ni amatlapohuali quihuica itoca Josué catli Moisés quitequimacac quen tlayacan-quetl quema ayamo miquiyaya. Techpohuilía catli panotiyajqui ica nopa israelitame quema ya mictoya Moisés huan Josué quinyacanqui para calaquire huan moaxcatise nopa tlali Canaán. Nopa israelitame quiixcotonque hueyatl Jordán huan TOTECO quinhuelonili itepa altepetl Jericó pampa quineltoquilijque. Teipa moaxcatijque miyac altepeme ica itlapalehuil. Se versículo tlen Josué catli nelía tlaiximatili eltoc Josué 24:15: “Xijtla-pejpenica ama ni tonal ajqueya anquihueyichihuase, ... pero naya huan nochi nocham-poyohua tijtequipanose san TOTECO.”

Josué quiyiya macuili partes:

Josué 1—12 Israelitame quitlanque tlali Canaán

Josué 13—21 Quixelojque nopa tlali Canaán ica nochi 12 huejhueyi familias.

Josué 22 Nopa familias catli quipixque ininchaj ica campa hualquisa tonati tlen hueyatl Jordán mocuepque inintlal.

Josué 23 Josué quinnahuatijtehua.

Josué 24 Quiompahuíaj nopa camanal sencahuali ipan Siquem.

TOTECO quinojnotzqui Josué

1 Moisés, itequipanojca TOTECO mijqui, huan TOTECO quinojnotzqui Josué, itelpoca Nun, catli ipa quipalehuiyaya Moisés huan quiillhui:

2“Ya mijqui notequipanojca Moisés. Huajca ama monequi para ta ininhuaya nochi ni masehualme ximocualtlalica huan xiquixcotonaca ni hueyatl Jordán para anyase ipan nopa tlali catli nimechmacas. 3Huan na nimechmacas nochi nopa tlali catli ipan annejntiyase quen ihuaya nimocajqui Moisés para nijchihuas. 4Nimechmacas nopa tlali catli pehua ipan huactoc tlali ica sur huan onajsi ica norte hasta nopa tepetl Líbano. Campa temo tonati nopa tlali pehua ipan nopa Mediterráneo hueyi atl huan yohui hasta nopa hueyi hueyatl Eufates. Quena, nochi inintlal nopa heteo masehualme elis amoaxca. 5Amo aqui huelis mitztlanis ipan nochi monemilis. Na niitzos mohuaya quen niitztoya ihuaya Moisés. Amo

quema nimitzcajtehuas, niyon amo nimitztlahuelcahuas. 6Ximoyoltetili huan ximoyolchicahua pampa ta tiquinyacanas ni masehualme para tiquinaxcatis nopa tlali catli ininhuaya nimocajqui ininhuajcapan tatahua para niquinmacasquí. 7San ximoyoltetili huan ximoyolchicahua. Ximomocuitlahui para tijchihuas nochi nopa tlanahuatilme catli notequipanojca Moisés mitzmacatejqui. Huan sintla tijchihua nochi quen catli eltoc ipan nopa tlanahuatilme, huajca nochi catli tijchihuas quisas cuali. 8Amo quema xijcagua xiquinelnamiquiltijnemi israelitame catli quijtohua nopa amatlapohuali catli quiyiya notlanahuatil. Ximoilhujtinemi tlen notlanahuatil tonali huan yohuali para huelis tijchihuas nochi catli quijtohua. Quej nopa tinejnemis ica tlanamiquilistli huan nochi catli tijchihuas quisas cuali. 9Pero nimitznahuatía ximoyoltetili huan ximoyolchicahua. Amo ximajmahui, niyon amo ximotequipacho, pampa na, ni-

moTECO Dios, niitztos mohuaya campa hueli campa tinentinemis.”

**Josué mocualtlali
para quitlanise nopa tlali**

10 Huajca Josué quinnahuati nochi catli quinyacanayaj nopa masehualme: 11 “Xiyaca ipan nochi yoyon calme huan xiquinnahuatica nochi israelitame ma quisencahuaca tlacualistli, pampa ica eyi tonali tiquixcotonase ni hueyatl Jordán para timoaxcatise nopa tlali catli TOTECO Dios techmacas.”

12 Nojquiya Josué quincamanalhui iteipán ixhuihua Rubén, Gad huan nopa tlajco iteipán ixhuihua Manasés huan quinihlui:

13-14—Xiquelnamiquica catli anmechnahuati Moisés, itequipanojca TOTECO. TOTECO Dios anmechmacatoc ni tlali ipan ni inaliyo hueyatl Jordán para nica huelis anmosiyajquetzase. Huan anquincajtehuase amosihuajhua, amonehua huan amotlapiyahlua nica, pero nochi amosoldados monequi quipanose ni hueyatl ica inintepos mocualtlalijtose para tlahuilanase. Inijuanti quintlayacancuilijtose huan quinpalehuise inicnihua para quitlanise nopa tlali. 15 Huan amosoldados tlahuilanase nozona ipan seyoc inaliyo hasta quema TOTECO techpalehuis ma tijtlanica nopa tlali campa ne sequinoc israelitame huelise mosiyajquetzase. Teipa anmocuepase nica ipan amotlal ipan ni inaliyo Jordán para campa hualquisa tonati huan ya anitztose ica paquilstli ipan ni amotlal catli anmechmacac Moisés, itequipanojca TOTECO.

16 Huan inijuanti tlananquilijqque:

—Tijchihuase nochi catli technahuatijtoc, huan campa techtitlanis, nozona tiyase. 17 Quen tijneltoquilijqque Moisés nochi catli technahuati, nojquiya nochipa timitzneltoquiliise. San tijnequij para TOTECO Dios catli tijtequipanohuaj ma mohuaya yohui quen ihuaya yajqui Moisés. 18 Sintla se acajya amo quinequi quichihuas catli ta tijnahuatís, tijmictise. San ximoyoltetili huan ximoyolchichaha.

**Josué quintitlanqui tlacame
ma quiitaca Jericó**

2 Teipa Josué quinnahuati ome israelitame ma quisaca ipan Sitim campa itzttoyaj huan ihtacatzi ma yaca para quitatij quenicatza eltoc nopa tlali Jericó. Quinilhui: “Xiyaca xijtlajtlachilitij nopa tlali huan nopa altepetl Jericó.”

Huan nopa ome tlacame yajque Jericó huan ajsitoyaj ipan se cali campa cochij ajsini. Huan nopa cali eliyaya iaxca se ahuilnencia sihuatl itoca Rahab huan nozona mocajque. 2 Pero se acajya quiyolmelahuato nopa tlanahuatijquetl tlen Jericó para ajsitoyaj sequin israelitame nopa yohuali para quitlachilise nopa tlali.

3 Huajca nopa tlanahuatijquetl tlatitlanqui ma quihuitij Rahab:

—Techmaca nopa tlacame catli itztoque ipan mochaj, pampa hualajtoque para quitlachilise quenicatza huelis quitlanise toaltepe.

4 Pero nopa sihuatl ya quintlatijtoya nopa tlacame huan huajca quijto:

—Melahuac sequin tlacame nechpaxalocoj, pero amo nijmatqui canque ehuayayaj. 5 Huan quema tlayohuixqui, ipan nopa hora para quitzacuase nopa puerta ipan nopa tepamitl catli quiyahualohua toaltepe, inijuanti yajque. Huan amo nijmati canica yajtoque. Pero sintla nimantzi anquintoquiliise, huelis anquinajsitij.

6 Pero nelía nopa sihuatl quinchihualtijtoya nopa israelitame ma tlejcoza calpani huan quintlatijtoya itzala ome tlamontomitl tlen lino icuayo catli quihuatzayaya.

7 Huan nopa tlacame catli nopa tlanahuatijquetl quintitlantoya quintemojtijyajque nopa ome tlacame ipan nopa ojtli catli ajsi hueyatl Jordán campa masehualme hueli quixcotonase. 8 Huan teipa quema ayamo cochiyajaj nopa tlacame catli yajque quitlachilitij nopa tlali, Rahab tlejcoza calpani huan quinilhui:

9—Na nijmati Dios anmechmacatoc ni tlali pampa yaya quichijtoc para nochi totlal ehuaní ma anmechimacacasa. Melahuac nochi catli itztoque nica ya majmajcamiquij por amojuanti. 10 Tijcactoque

quenicatza Dios anmechhuachili nopa atl ipan nopa Hueyi Atl Chichiltic para huelqui anquiixcotonque quema anquisque tlali Egipto. Nojquiya tijcactoque quenica-tza anqintzontlamiltijque Sehón huan Og, nopa ome inintlanahuatijcahua am-reos catli itztoyaj ipan ne seyoc inaliyo hueyatl Jordán. **11** Huan quema tijcajque nochi ya ni, nelía timajmajque hasta amo aqui motemaca para anmechhuilanas, pampa Dios, amoTECO, yaya quinahuatía ilhuicac huan taltipactli. **12** Yeca na nimechtlajtlanía chichahuac, xijtestigojquetzaca amoTECO para antechchihuilise catli cuali, na huan nochi noteiximatcahua, quen na nimechchihuilijtoc. Techilhuica para melahuac **13** antechmanahuisse, na ica notata, nonana, notlaca icnihua huan nosihua icnihua huan nochi catli toaxcahua para amo timiquise.

14 Huan tlananquilijque:


—Timechmanahuisse sintla techmanahuis huan amo aqui tiquilhuis tlen tojuanti. Quena, sintla amo techcajcayahuas, timitzchihuilise catli cuali huan catli xitlahuac quema TOTECO techmacas ni tlali.

15 Huan ichaj Rahab eltoya ipan nopa hueyi tepamitl catli quiyahualo nopa altepetl. Huajca ica se hueyi mecatl Rahab quintemohui nopa israelitame ipan se iventana nopa tepamitl. **16** Huan Rahab quinilhui:

—Xiyaca ipan tepeme para amo anmechpantise nopa tlacame catli anmechtemohuaj. Ximotlatica nozona para eyi tonali hasta injuanti sempa hualase. Teipa huelis anyase.

17 Huan quinanquilijque:

—Tojuanti tijchiuase catli tijtestigojquetzque, pero amo elis totlajtlacal sintla timiquis sintla amo techneltoca. **18** Huajca quema tijcaquis para tojuanti ticalactihualahuij ipan ni tlali, xijhuiyoni ni hueyi mecatl chichiltic ipan moventana catli ica techtemohuijtoc huan xiquinsentili nica calijtic motata, monana, moicnihua huan nochi ininteiximatcahua. **19** Sintla se quisas, elis itlajtlacal sintla miquis. Pero sintla acajya quinpanajsis catli itztoque ipan ni mochaj, huajca elis tojuanti totlajtlacal. **20** Pero sin-



Ica se mecatl, quintemohui nopa tlacame ipan se iventana nopa tepamitl.

tlali tiquinilhuis sequinoc tlen ni tlamantli, tojuanti ayacmo monequi tijchihuase catli timitzilhuijque huan tijtestigojquetzque TOTECO para timitzchihuilise.

21—Cualtitoc, quej nopa timocahuaj —tlananquili Rahab.

Huajca monahuatijque huan injuanti yajque. Teipa nopa sihuatl quihuiyoni nopa hueyi mecatl chichiltic ipan iventana.

22 Huan nopa ome tlacame yajque ipan tepeme huan nozona motlatijque para eyi tonali hasta nopa soldados catli quintemo-

huayayaj campa hueli ipan nopa ojtl sem-
pa yajque altepetl Jericó pampa amo
quinpantijque. ²³Huajca teipa nopa ome
tlacame temoque tlen nopa tepeme huan
panoque hueyatl Jordán huan ajsitaj cam-
pa itztoya Josué itelpoca Nun huan quipo-
huilijque nochi catli panotoya. ²⁴Huan
quihuijque Josué: “TOTECO quitlalijtoc
tomaco nochi nopa tlali pampa nochi catli
itztoque ipan nopa tlali ya majmajcami-
quij por tojuanti.”

Nopa israelitame quiixcotonque hueyatl Jordán

3 Hualmostla nselcualca Josué ihuaya no-
chi nopa israelitame quisque Sitim,
huan ajsitaj hueyatl Jordán huan tonilijque
nozona. ²Huan quema ya panotoyay eyi to-
nali nozona iteno nopa hueyatl, nopa tlaya-
canani panotinenque campa nochi nopa is-
raelitame, ³huan quinnahuatijque catli mo-
nequi quichihuase. Quinilhuijque: “Xiquin-
tlachilica nopa levita totajtztzi catli quipi-
yay inintequi para quihuicase icaxa TOTECO
Dios catli quiyiya catli tohuaya mocajtoc.
Huan quema anquinatase quistehuase, huaj-
ca xiquisaca huan xiquintoquilica. ⁴Quej
nopa anquimatise canica monequi anyase,
pampa amo quema anpanotoque ipan nopa
ojtli hasta ama. Pero amo xijnechcahuica
icaxa TOTECO. San xijhujcaitzitziyaca quen
se kilómetro ihuejca.”

⁵Huan Josué quinilhui: “Ximoyolpajpa-
caca iixpa TOTECO quen anmechilhujtoc
para ximoiyocatlica para ya, pampa mos-
tla TOTECO quichihuase huejhueyi tlamantli
amoixpa ica catli anquissentlachilise.”

⁶Huan Josué quinnotzqui nopa totaj-
tztzi huan quinilhui: “Xijhuicaca icaxa
TOTECO catli quiyiya catli tohuaya mocaj-
toc huan techtlayacancuilica para ancala-
quise ipan ni hueyatl.”

Huajca nopa totajtztzi quiajcolpantlij-
que nopa caxa huan quintlayacancuilijque
nopa masehualme. ⁷Huan TOTECO quilhui
Josué: “Ni tonal nipehuas nimitzhueyitlalis
iniixpa nochi israelitame. Quej nopa quita-
se para temachtli na niitztoc mohuaya quen
niitztoya ihuaya Moisés. ⁸Huan xiquinna-
huati nopa totajtztzi catli quihuicaj nopa

caxa para quema ajsise iteno nopa hueyatl
Jordán, ma calaquica huan ma nejnemica se
quenzti. Huan teipa ma moquetzaca nozona
ipan nopa hueyatl.”

⁹Huajca Josué quinilhui nopa israelita-
me: “Xihualaca huan xijtlacaquilica catli
quijtohua TOTECO Dios catli tijtequipano-
huaj. ¹⁰Ama anquiatase para Toteco Dios
catli itztoc, nelía itztoc amohuaya, huan
yaya quiniyuiniytziyamoixpa nochi no-
pa cananeos, hititame, heveos, ferezcos,
gergescos, amorreos huan jebuseos. Huan
quej ni anquimatise. ¹¹Icaxa Toteco, yaya
nopa Dios catli quinnahuatía nochi talti-
pactli ama quiixcotonas nopa hueyatl Jor-
dán amoixpa. ¹²Huajca xiquintlapajpeni-
ca 12 tlacame, se tlen sesen hueyi familia.
¹³Huan quema calaquise atitla iniicixhua
nopa totajtztzi catli quihuicaj icaxa TO-
TECO huan inijuanti moquetzase ipan no-
pa hueyatl, ipan nopa tlatoctzi nopa atl
moxelos. Huan nopa atl catli huala ica
huejcapa ayacmo motlallos. San mosansej-
cotilis huan mochihuas se tlamontomitl
pampa nopa caxa iaxca TOTECO, yaya catli
quinnahuatía nochi taltipactli.”

¹⁴Huajca nopa israelitame quisque pa-
ra quiixcotonase hueyatl Jordán, huan no-
pa totajtztzi quintlayacancuilijyayaj qui-
huicayayaj nopa caxa catli quipixqui catli
ininhuaya mocajqui TOTECO. ¹⁵Huan el-
qui ipan nopa tonali para pixquistli quema



*Totajtztzi quihuicayayaj nopa caxa para
quiixcotonase hueyatl Jordán.*

nopa hueyatl Jordán temic miyac. Huan quema nopa totajtzitzi calajque ipan nopa hueyatl huan mometzxolonijque, ¹⁶nopa atl catli hualayaya ica huejcapa ayacmo motlalo. San sejo momanqui nopa atl hasta nesiya huejcapantic quen se hueyi tepamitl. Momanqui nopa atl huejca tlen nopa israelitame. Momanqui nozona nechca altepetl Adam huan ajsic hasta altepetl Saretán. Huan nopa atl catli ya quinpanoc huan temoyaya para hueyi atl catli itoca Mictoc temotiyajqui hasta ayacmo nesqui. Quej nopa moxelo nopa atl ipan hueyatl Jordán, huan nopa israelitame quiixcotonque iixmelac altepetl Jericó. ¹⁷Huan nopa totajtzitzi catli quihuicayayaj icaxa TOTECO moquetzque tlatlajco hueyatl Jordán ipan tlali huactoc hasta nochi nopa sequinoc israelitame quiixcotonque nopa hueyatl.

**Se temontomitl para teelnamiquiltis
catli TOTECO quichijqui**

4 Nochi nopa masehualme quiixcotonque hueyatl Jordán, huan teipa TOTECO quiilhui Josué: ²“Xiquintlapejpeni 12 tlacame tlen nopa israelitame, se tlen sesen nopa huejhueyi familias. ³Huan xiquinilhui ma quiquixtica 12 teme catli eltoc tlatlajco nopa hueyatl nechca campa ijcatoque nopa totajtzitzi. Huan ma quihuicaca huan ma quitlalica campa mosiyajquetzase ni yohuali.”

⁴Huajca Josué quinnotzqui nopa 12 tlacame catli quintlapejpenijtoya tlen sesen nopa huejhueyi familias, ⁵huan quinilhui: “Xicalaquica ipan nopa hueyatl hasta tlatlajco campa eltoc icaxa TOTECO Dios. Huan sese amjuanti ximoquechpantlalilitij se tetl huan xijhualicaca nica. Monequi 12 tetl quen ininmiyaca itelpocahua tohuejcapan tata Israel ica catli pejqui nopa 12 huejhueyi familias. ⁶Huan ni teme elis quen se tlanextilijcayotl para amjuanti. Huan teipa quema amoconehua anmechtlatzintoquilise: ‘¿Tlaque quijtosnequi ni teme?’, ⁷anquinnanquilise: ‘Quema nopa tlacame catli quihuicayayaj icaxa TOTECO tlayacantiyajque para calaquise ipan hueyatl Jordán, nopa atl moxe-

lo. Huajca ni teme mocahua quen se tlanextilijcayotl para nochi israelitame ma quielnamiquica catli panoc nopa tonal.’”

⁸Huajca nopa tlacame quichijque catli Josué quinnahuatijtoya. Quicuique 12 teme tlen Jordán quen imiyaca nopa huejhueyi familias tlen israelitame. Huan quihuicaque campa mosiyajquetzaj nochi nopa israelitame huan nozona quinquetzque quen TOTECO quiilhuijtoya Josué. ⁹Nojquiya Josué quiquetzqui seyoc 12 teme ipan nopa hueyatl campa ijcatoyaj nopa totajtzitzi catli quihuicayayaj icaxa TOTECO. Huan nopa teme noja eltoc hasta ama.

¹⁰Huan nopa totajtzitzi catli quihuicayayaj icaxa TOTECO mocajque tlatlajco hueyatl Jordán hasta quema nopa israelitame tlanque quichihuaj nochi catli TOTECO quinnahuatijtoya Josué para ma quinilhui nopa israelitame ma quichihuaca, huan nojquiya catli Moisés quinnahuatijtoya Josué ma quichihua.

Huan nopa israelitame moisihuiltijque para panose. ¹¹Huan quema nochi nopa israelitame ajsique ne seyoc inaliyo nopa hueyatl, nopa totajtzitzi ica icaxa TOTECO quiixcotonque iniixpa nochi nopa masehualme. ¹²⁻¹³Huan nechca 20 mil soldados catli hualajque tlen nopa huejhueyi familias Rubén, Gad huan tlen tlatlajco nopa hueyi familia Manasés nojquiya panoque iniixpa nochi nopa israelitame. Huan inijuanti mocualtlalijtoyaj para tlahuilanase huan quihuicayayaj inintepon quen Moisés quinnahuatijtoya. Huan panoque iniixpa TOTECO huan yajque ipan nopa tlamayamitl nechca altepetl Jericó. ¹⁴Huan ipan nopa tonal TOTECO quihueyitlali Josué iniixpa nopa israelitame, huan yeca quitlepanitacque Josué nochi inemilis san se quen quitlepanitacque Moisés ipan nochi inemilis.

¹⁵Teipa TOTECO quiilhui Josué: ¹⁶“Xiquinnahuati nopa totajtzitzi catli quihuicaj nopa caxa ica catli amohuaya nimocajtoc para ma quisaca hueyatl Jordán huan ma tlejco ca campa tiitztoc.”

¹⁷Huan Josué quinnahuati ma tlejco ca, ¹⁸huan nimanntzi quema nopa totajtzitzi catli quihuicaj icaxa TOTECO quisque

ipan nopa hueyatl huan moquetzque ipan tlali huactoc ipan ni inaliyo, nopa atl ipan nopa hueyatl sempa mosentili quen achti-hui eltoya huan sempa tlatemiyaya miyac.

**Nopa teme para teelnamiquiltis
ipan Gilgal**

¹⁹Huan nopa israelitame tlejoque tlen hueyatl Jordán ipan majtlaclti itequi nopa achtihui metztlí ipan ininxihui. Huan qui-quetzque ininyoyoncalhua nechca Gilgal iixmelac Jericó ica campa hualquisa tonati. ²⁰Huan ipan Gilgal Josué quinquetzqui nopa 12 teme catli quihualicaque tlen hueyatl Jordán, ²¹huan quinilhui nopa israelitame: “Mostla huiptla quema amoc-nehua catli tlacajtiyase anmechtlatzintozquise: ‘¿Tlaque quijtosnequi ni teme?’, ²²xiquinpoahuilica para ni teme techelnamiquiltía para tiisraelitame tijpanoque ni hueyatl Jordán ipan tlali huactoc. ²³Pampa TOTECO Dios quihuatzqui nopa atl hasta nochi tipanoque san se quen quihuatzqui nopa Hueyi Atl Chichiltic achtihui hasta tipanoque. ²⁴Quena, xiquinpoahuilica catli quinequi quijtos ni teme para nochi masehualme ipan ni tlaltipactli ma quimatica TOTECO Dios quiipiya hueyi chichahualistli huan para amojuanti nochipa xijhuyetlepanitaca.”

**TOTECO quinchihuili israelitame
se tiochicahual nextili.**

5 Huan quicajque catli TOTECO quinchihuili nopa israelitame nochi nopa tlanahuatiani tlen nopa amorreos catli itztoyaj ipan ni inaliyo Jordán campa temo tonati huan nochi nopa tlanahuatiani tlen cananeos catli itztoyaj nechca hueyi atl. Quicajque quenicatza TOTECO quihuatztoya nopa hueyatl Jordán hasta nopa israelitame quiixcotontoyaj. Huan yeca nochi nelía majmajcamiquiyayaj huan tlami huihuipicayayaj hasta amo aqui motemacac quinhuilanati.

**Sempa tetequilíaj
nopa machiyotl circuncisión**

²Huan TOTECO quiilhui Josué: “Xijchihua cuchillos tlen tetl, huan sempa xiquin-

panolti nochi israelita tlacame huan oquichpilme huan xiquintzontequili iyecapa cuetlaxo inintlacayo sintla ayamo quichijtoque. Xijchihua san se quen anquichijque achtihuiya.”

³Huan Josué quichijqui cuchillos huan quintequili nopa iyecapa cuetlaxo nochi oquichpilme huan tlaca israelitame ipan se tlachiquili catli quitocaxtijque Aralot. (Aralot quijtosnequi “tlachiquili tlen nopa cuetlaxtli catli tetequilijque”). ⁴⁻⁶Quema achtihui quisque tlali Egipto, nochi oquichpilme huan tlaca israelitame ya motequilijtoyaj. Pero teipa monequiyaya nejnemise ²⁰xihuitl ipan nopa huactoc tlali campa amo tleno onca hasta mijque nochi nopa tlacame catli quisque ipan tlali Egipto huan quipixque xihuitl para tlahuilantij mijque. Huan nopa oquichpilme catli tlacajtihualajque ipan nopa huactoc tlali amo quintequilijtoyaj. Inintatahua mijque pampa amo quinejque quinelto-case TOTECO huan calaquise ipan nopa tlali catli nochi temaca hasta mocahua itlajca. Yeca TOTECO motlali ica iseltzi para amo quincahuilis nopa tlacame ma quilitaca nopa cuali tlali catli ininhuaya mocajtoya ininhuejcapan tatahua para quinmacas. ⁷Huajca Josué quintequili iyecapa cuetlaxtli inintlacayo nochi tlacame huan oquichpilme catli tlatatque ipan nopa huactoc tlali pampa inintatahua catli mijque amo quintequilijtoyaj. Huan ama TOTECO quincahuilía ma calaquica ipan nopa tlali ininpatlaca inintatahua catli amo quinequiyayaj. ⁸Huan quema tlantoyaj para quintequilise nopa machiyotl ipan nochi tlaca israelitame, mocajque nopona campa itztoyaj hasta mochicajque huan ayacmo cuajcualohuayaya inintlacayo.

⁹Huan huajca TOTECO quiilhui Josué: “Ama, pampa anmotequilijtoque iyecapa cuetlaxo amotlacayohua, nimechquixtilijtoc nopa pinahualistli catli anquipixque ipan tlali Egipto.” Huajca quitocaxti Gilgal campa itztoyaj. (Gilgal quijtosnequi “quixti”). Huan quej nopa itoca hasta ama.

¹⁰Huajca quema nopa israelitame noja mocahuayayaj ipan Gilgal ipan nopa tlamayamitl nechca altepetl Jericó, ilhuichij-

que para quinextijque nopa Pascua Ilhuil
ica tiotlac ipan 14 itequi nopa metztli.
11 Huan hualmostla quicuaque catli qui-
pantiyayaj tlen itlajca nopa tlali huan qui-
chijque pantzi catli amo quiptiyayaya tla-
sonejcaoytl huan quicuaque cuayolotl
tlaisectli. 12 Huan ipan seyoc tonal quema
ya quicuahtoyaj itlajca nopa tlali, ayacmo
huetzqui maná. Huajca nopa israelitame
ayacmo quema quipixque maná para qui-
cuase. Nopa xihuil san quicuahtiyajque
nopa pixquistli catli quipantijtinemiyajaj
ipan tlali Canaán.

**TOTECO quititlanili Josué
se itlapalehuijca**

13 Huan ipan nopa tonal quema Josué
huan nopa israelitame itztoyaj nechca al-
tepetl Jericó, monexti iixpa se catli nesqui
quen se tlatcatl catli quiptiyayaya se ma-
chete imaco. Huan Josué quinechcahui
huan quitlatzintoquili:

—¿Tíitztoc tohuaya o tíitztoc ininhua-
ya tocualancaitacahua?

14—Amo ya nopa —tlananquili nopa
tlatcatl. Na nihualajtoc pampa nitlayacan-
quetl catli más nihueyi tlen itequihua-
hua TOTECO.

Huajca Josué motlancuaquetzqui huan
mohuijtzonqui hasta icuajtol ajsic tlalchi,
huan quihueyichijqui huan quiilhui:

—Nimotequipanojca. Techilhui tlaque
tijnequi ma nijchihua.

15 Huan nopa hueyi tlayacanquetl tlen
itequihuaicahua TOTECO tlananquili:

—Ximotecacquiixti. Campa tijcatoc el-
toc tlatzejtzolotic, pampa na, nimoTECO,
nojquiya nijcatoc nica.

Huan Josué quichijqui catli quiilhui.

**Nopa israelitame quitlanque
altepétl Jericó**

6 Amo aqui hueliyaya calaquis, niyon
quisas tlen altepétl Jericó pampa cuali
quitzahtoyaj nopa puertas ipan inintepa
catli quiyahualo pampa inijuanti quinima-
casiyayaj nopa israelitame. 2 Huan TO-
TECO quiilhui Josué: “Na nimitzmactilij-
toc altepétl Jericó, huan itlanahuatijca
huan nochi isoldados para anquitlanise.

3 Ta huan nochi amosoldados xinejnemica
yahualtic ne altepétl se huelta. Quej nopa
monequi xijchihuaca mojmotla para chi-
cuase tonali. 4 Teipa nejnemise nopa chi-
come totajtzitzi catli quitlayacanaltise
icaxa TOTECO. Huan sesen totajtzitzi ma qui-
huica se icuacua se oquich borrego. Huan
quema ajsis nopa tonal chicome, xijyahua-
loca nopa altepétl chicome hueltas huan
nopa totajtzitzi quipitztiyase nopa cua-
cuahtli. 5 Huan quema anquicaquise para
huejcahuase tlapitztose chichahuac huan
amo motensehuse, nochi amomasehual-
hua ma tzajtzica ica nochi ininchicahua-
lis. Huan huetzis nopa tepamitl catli ica
quiyahualohtoque nopa altepétl. Huan
ipan nopa tlatoctzi monequi nochi amo-
juanti xicalaquica ipan nopa altepétl huan
xiquinhuilanatij catli itztoque amoixme-
lac.”

6 Huajca Josué, icone Nun, quinnotzqui
nopa totajtzitzi huan tlacame huan quin-
ilhui: “Xijcuica nopa icaxa TOTECO catli
quiptya catli tohuaya mocajtoc. Huan chi-
come tlen amojuanti anquitlayacancuili-
se. Huan sesen amojuanti anquihucase
icuacua se oquich borrego.” 7 Huan quin-
ilhui nopa israelitame: “Amantzi xiyaca
xinejnemica yahualtic nopa altepétl. Tla-
yacantiyase nopa soldados ica inintepos
para tlahuilanase, teipa nopa chicome to-
tajtzitzi ica tlapitzzali huan teipa icaxa TO-
TECO.”

8 Huan nochi quichijque catli Josué
quinilhui. Nopa chicome totajtzitzi tla-
pitztiyohuiyayaj huan amo mosiyajque-
tzayayaj huan quinyacanayayaj nopa to-
tajtzitzi catli quihuicayayaj icaxa TO-
TECO. 9 Huan iica nopa caxa hualase más
soldados para tlamocuitlahuise iica.

10 Huan Josué nojquiya quinnahuati
nopa israelitame: “Amo xicamanaltica
hasta nopa tlatoctzi quema nimechnahua-
tis xitzajtzica. Huan ipan nopa tlatoctzi
monequi xitzajtzise ica nochi amochica-
hualis.”

11 Huajca nopa tonal quihuicaque ica-
xa TOTECO huan nejnemise yahualtic
nopa altepétl se huelta. Teipa sempa yaj-
que campa mocajtoyaj huan nozona to-

nilijque. 12-13 Huan hualmostla nelcualca Josué mejqui huan nopa totajtzitzi quiajcolpantlalijque icaxa TOTECO. Huan nopa soldados ica inintepos para tlahuilanase tlayacantiyohuiyayaj. Teipa tlapitztihuayayaj chicome totajtzitzi catli quihuicayayaj sese inintlapitzal catli quichijtoyaj tlen icuacua se oquich borrego. Teipa hualayayaj nopa totajtzitzi catli quihuicayayaj icaxa TOTECO. Huan teipa sequinoc soldados quitoquiliyayaj nopa caxa. Huan nopa catli tlapitzayayaj amo motensehuiyayaj. 14 Huan quiyahualojque nopa altepetl se huelta. Huan quej nopa quichijque mojmosta para checuase tonali.

15 Quema ajsic nopa chicompa tonal, nochi mejque nelcualca huan pejqe quiyahualohuaj nopa altepetl quen achitihui quichijtoyaj, pero ama quiyahualojque chicome hueltas. 16 Huan quema tlamiyaya chicome hueltas nopa totajtzitzi nelchicahuac huejcajqe quipitzque nopa cuacuatli huan amo motensehuijque. Huan Josué quinnahuati nopa tlacame: “¡Xitzajtzica, pampa TOTECO anmechmactilijtoc ni altepetl! 17 Xiquinmictica nochi catli itztoque ipan ni altepetl huan xijsemanaca nochi catli eltoc nozona. Nochi eltos quen se tlcacajchualistli para TOTECO. San xiquincahuilica ma itztoca Rahab nopa ahuilnenca sihuatl huan catli itztose ihuaya ipan ichaj pampa yaya quintlati nopa tlcacame catli quitlachilicoj ni tlali. 18 Ximomocuitlahuica para amo anquiixtocase niyon se tlamantli ipan nopa altepetl para anmocuilese pampa nochi iaxca TOTECO huan techilhui ma tijsemanaca. Huan sintla se mocuilis se tlenijqui, icualancayo TOTECO techajsis nochi tiisraelitame. 19 San xijhualicaca nochi tlen oro, huan tlen plata, huan nochi tlamantli tlen bronca huan tlen hierro pampa ya nopa monequi tiquiyocatlalise para TOTECO. Huan ticajocuisse campa eltoc nochi tlamantli catli patiyoy catli iaxca.”

20 Huajca nopa totajtzitzi quipitzque nopa tlapitzali. Huan quema nopa israelitame quicajque nopa tlapitzali, tzajtzitzi que tlahuel chichahuac, huan nopa tepa-

mitl catli ica quitzactoyaj nopa altepetl huetzqui. Huan sesen calajqui xitlahuac iixmelac ipan nopa altepetl huan quintzontlamiltijque catli itztoyaj. 21 Huan quintlamimictijque ica machete nochi tlcacame, sihuame, telpocame, ichpocame, huehuentzitzitzi huan tename. Nojquiya quinmictijque nochi huacaxme, borregojme huan burrojme. Nochi quintzontlamiltijque.

22 Huan Josué quinilhui nopa ome tlcacame catli yajtoyaj tlapijpiyatoj ipan nopa tlali: “Xiyaca ichaj nopa ahuilnenca sihuatl huan xijquixtica ica nochi masehualme catli ihuaya itztoque quen ihuaya anmocajque.”

23 Huajca nopa tlcacame calajque huan quinquixtijque Rahab ihuaya itata, inana, iicnihua, iteiximatcahua huan nochi inintequipanojcahua. Huan quinhuicaque ma itztoca huejca tlen campa mocajcajtoyaj nopa israelitame ipan ininyoyoncalhua. 24 Teipa nopa israelitame quitlatijque nopa altepetl huan nochi catli oncayaya nozona. San quiquixtijque catli elqui tlen plata, oro huan nochi tlamantli tlen bronca huan hierro huan quitlaltijque ipan itioipa TOTECO campa quiajocuiyayaj nochi tlamantli catli patiyoy catli iaxca. 25 Huan Josué quinmanahui Rahab, iteiximatcahua huan inintequipanojcahua pampa quintlatijtoyoy nopa tlcacame catli quintitlantoyoy ma quitlachilitij altepetl Jericó. Huajca hasta ama Rahab noja itztoc ininhuaya israelitame.

26 Huan teipa Josué quitelchijqui ajqueya quicualchijchihuasquia nopa altepetl. Huan quijto:

“Tlatelchihuali nopa tlcacatl catli sempa quicualtlalisnequis ni altepetl.

Miquis iachtihui ejca oquichpil quema pehuas quitlalis itzinpehualtil.

Huan quema quiquetzcas nopa puertas, miquis ioquichpil catli más teipa ejquetl.”

27 Huan TOTECO itztoyoy ihuaya Josué. Huan nochi masehualme campa hueli quicajque catli TOTECO quichijtoyoy.

Tlajtlacol Acán

7 Pero amo nochi nopa israelitame quineltoaque catli Josué quinilhui. Amo quitlamiltijque nochi quen nopa tlanahuatili quijto ma quichihuaca. Itztoya se tlatcatli ipan nopa hueyi familia Judá catli tlajtlacolchijqui. Itoca eliyaya Acán huan elqui icone Carmi, catli elqui icone Zabdi catli elqui icone Zara. Huan Acán mocuili tlamantzitzi ipan nopa altepetl catli monequiyaya ma quitlati. Huajca TOTECO tlac huel cualanqui ica nochi israelitame por nopa tlajtlacoli.

Inincualancaitacahua israelitame quintlanque

2 Teipa quema ya quitlantoyaj nopa altepetl, Josué quintitlanqui sequin tlacame ma quisaca Jericó huan ma quitlajtlachilitij altepetl Hai catli mocajqui nechca Bet Avén huan campa hualquisa tonati tlen Betel. Huan inijuanti yajque. 3 Huan quema sempa hualajque, quillhuijque Josué: “Amo monequi ma yaca nochi tosoldados pampa amo miyaqui masehualme ipan nopa altepetl. San monequi xiquintitlani ome o eyi mil soldados para quintlanise Hai tlacame para amo nochi soldados yase huan siyahuisse.”

4 Huajca san eyi mil tlacame tlejcoque para quihuilanatij Hai. Pero Hai ehuan quinchijque ma cholojtehuaca. 5 Huan quintojtocatihualajque tlen huejcapa ipuertajteno inialtepe hasta altepetl Sebarim. Huan quinmictijque huelis se 36 israelitame ipan nopa tlaixtemolis. Yeca nochi israelitame huihuipicayayaj ica majmajtli.

6 Huan Josué huan nopa huehue tlacame quitzayanque ininyoyo huan motlanquaquetzque ica iniixyac tlatlchi iixpa icaxa TOTECO huan motzontlaltémijque quen se tlanextilijcayotl para tlac huel motequipachohuayayaj. Quej ni mocajque hasta quema tiotlaquixqui. 7 Huan Josué quijto:

—¡TOTECO Catli Más Tijpiya Tlanahuatili! ¿Para tlen tijchijqui tiisraelitame ma tiquixcotonaca hueyatl Jordán sintla techtemactilis ininmaco nopa amorreos para ma techzontlamiltica? ¡Más cuali sintla

timocajtosquíaj ica catli tijpixtoyaj ipan ne seyoc anali! 8 Ama amo nijmati tlaque niquijtos pampa ni israelitame cholojte-toque iniixpa inincualancaitacahua. 9 Huan nopa cananeo huan nochi catli itztoque nechca quicaquise catli panotoc, huan san sejco hualase huan techhuilana-se. Huan techzontlamiltise hasta amo aqui techelnamiquis ipan ni taltipactli. Huan ayacmo mitztlepanitase. Ayacmo hueyi elis motoca.

10 Huan TOTECO quinanquili:

—¡Ximotlanana! ¿Tlaque tijchihua ica moixyac tlatlchi? 11 Nopa israelitame tlajtlacolchijtoque pampa quiixpanoque catli niquinnahuati quema ininhuaya nimocajqui niquinmocuitlahuis. Quicuitoque tlamantli catli monequiyaya quitlamitlatliscuquíaj. Huan amo san quichitejque nopa tlamantli pero istlacatitoque huan ichtacatzitzi quitlatijtoque ica tlamantli catli ini-axca. 12 Yeca israelitame amo huelque ininhuaya motlalise inincualancaitacahua huan monejqui cholose, pampa ama tlatelchihualme ni israelitame. Huan sintla amo nima anquisosolose nopa tlamantli catli monequiyaya anquintlatiscuquíaj, ayacmo niitztos amohuaya. 13 Huajca ximotlanana huan xiquinilhui nopa israelitame ma mopajpacaca noixpa. Ma moiyo-catlalica para na pampa mostla monextise noixpa pampa quej nopa niamoteco Dios niquijtohua. Xiquinilhui para quipiyaj tlamantli catli monequiyaya quitlatijtosquíaj huan amo hueli motlalise ininhuaya amocualancaitacahua hasta anquiquixtise nopa tlamantli. 14 Mostla monequi nochi israelitame panose noixpa. Huan anquichihuase se sorteo para nimitznextilis ipan catlique nopa 12 huejhueyi familia eltoc ni tlajtlacoli. Teipa nochi iteipan ixhuihua nopa huejcapan tata catli elqui icone Israel panos noixpa por catli hualahuij ipan san se ininhuayitzi tata. Huan nimitznextilis ipan catlique hueyi tata iteipan ixhuihua onca ni tlajtlacoli. Huan teipa nochi catli tetajme catli hualajque ipan ya panose noixpa ica ininfamilias huan nopa tetaj catli nijtlapejpenis, monequi panose sesentzitzitelpocahua huan ininfamilias huan na nij-

tlapejpenis nopa tlacatl catli quichijtoc. ¹⁵Huan nopa tlacatl catli mocuilijtoc nopa tlamantli catli na, niamoTECO, niquin-ihui ma quitlatica, monequi anquimictise ihuaya nochi catli itztoque ipan ichaj. Te ipa xiquintlati ica nochi catli iniaxca pampa yaya quiixpanotoc nocamanal para amo tleno quiquixtisquía tlen Jericó. Yeca anmechmacatoc nochi anisraelitame se hueyi tlajtlacoli.

TOTECO quitlatzacuiliti Acán

¹⁶Huan hualmostla Josué mejqui cualca huan tlanahuati para nochi israelitame ma moyocatlalise ipan nopa ¹²huejhueyi familias huan quej nopa ma panoca iixpa Toteco. Huan TOTECO quinexti para elqui se ipan nopa hueyi familia tlen iteipan ixhuhua Judá catli quichijqui nopa tlajtlacoli. ¹⁷Teipa Josué quichijqui ma monextica iyoca iteipan ixhuhua sesen nopa huejcapan tatame catli itztoyaj iteipan ixhuhua Judá. Huan TOTECO quinexti para elqui se iteipan ixhui nopa huejcapan tata Zera catli quichijqui nopa tlajtlacoli. Huan sesen familia tlen itelpocahua Zera panoc huan quinexti para elqui ifamilia Zabdi. ¹⁸Huan teipa sesen telpocatl tlen Zabdi panoc ica iconehua, huan TOTECO quinexti para elqui Acán catli tlajtlacolchijtoya. Acán elqui itelpoca Carmi, huan iteipan ixhui Zabdi. Ihuejcapan tata itoca eliyaya Zera catli elqui itelpoca Judá itelpoca Israel tlen huejcayja.

¹⁹Huajca Josué quiilhui Acán:

—Nocone, xijhueyitlali TOTECO Dios catli tiisraelitame tijtequipanohuaj. Tech-ihui melahuac catli tijchijtoc. ¡Amo xijtlati!

²⁰Huan Acán quinanquili:

—Melahuac, nitlajtlacolchijtoc ica TOTECO Dios huan nimitzilhuis catli nijchijqui. ²¹Ipan nopa ricojyotl ipan altepetl Jericó, niquitac se yejyetzti yoyomitl catli hualajtoya tlali Babilonia. Huan niquitac ²⁰⁰plata tomi huan se tlatectli oro ica huelis tlajco kilo ietica. Huan nelía niquixtocac nopa tlamantli huan nimocuili. Huan tijpantis campa nijtlaltojqui ipan nohaj tlen yoyomitl ica nopa plata itzala.

²²Huajca nimantzi Josué quintitlanqui tlacame ipan ichaj huan quipantijque nochi catli quitlatijtoya tlatitla. ²³Huan quicuique tlen ichaj huan quihuicaque campa Josué huan nochi nopa israelitame mosentilijtoyaj. Huan nopona quitencajque nochi iixpa TOTECO. ²⁴Huan teipa Josué huan nochi nopa israelitame quihuicaque Acán, iteipan ixhui Zera, ipan nopa tlamayamitl catli itoca Acor. Huan ihuaya quitlalijque nopa plata, nopa yoyomitl, nopa oro huan isihua conehua huan itlaca conehua. Nojquiya quitlalijque ihuacaxhua, iburrojhua, iborregojhua huan ichaj tlen yoyomitl huan nochi catli eliyaya iaxca.

²⁵Huan Josué quiilhui Acán:

—Tijhualicac ipan tojuanti se hueyi tlaohuijcyotl. Huan ama TOTECO mitzmacas ta se tlaohuijcyotl.

Huan quema quiijto ya ni, nochi israelitame quitepachojque Acán ihuaya nochi catli iaxcahua hasta mijque huan teipa quintlatijque. ²⁶Teipa quintemilijque se tlamontomitl tlen tetl huan hasta ama noja ijcatoc. Huan nopa lugar noja itoca Tlamaya tlen Acor. (Acor quiijosnequi “campa tlaohuijcyotl”.) Huajca ica ya nopa tlanqui icualancayo TOTECO ica nopa israelitame.

Nopa israelitame quitlanque altepetl Hai

8 Huan teipa TOTECO quiilhui Josué: “Amo ximajmahui niyon amo xiyolcuesihui. Xiquinhuica nochi mosoldados huan sempa xijhuilanatij nopa altepetl Hai pampa na nijtlalijtoc momaco nopa tlanahuatijquetl tlen Hai huan imasehualhua. Huan anquitlanise inialtepe huan inintlal. ²Huan tijchihuas ica Hai huan itlanahuatijca san se quen tijchijqui ica Jericó huan itlanahuatijca. Pero ama quena, huelis amoaxcatise nochi tlamantli catli eltoc nopona huan nochi inintlapiyalhua. Huajca ichtacatzi xiquintitlani sequin amosoldados ma motlatica iica nopa altepetl para injuanti ma quinichtacahuise huan quitlanise.”

³Huajca Josué quincualtlali nochi isolatedos para quihuilanatij Hai. Achtihui quintlapejpeni ³⁰mil tlacame catli más

motemacaque para tlahuilanase. Huan quintitlanqui ica tlayohua, ⁴huan quinilhui: “¡Xijtlacaquilica cuali! Ximotlatica iica nopa altepetl pero nechcatzi. Huan ximocualchijchijtose para anquihuilanase. ⁵Huan na ihuaya nopa soldados catli mochahuaj nohuaya timonechcahuise iixmelac nopa altepetl. Huan quema injuanti catli itztoque ipan nopa altepetl quisase tlen nopa puertas ipan inintepa para techhuilanaquij, ticholose quen achtihuiya tijchijque. ⁶Huan injuanti techtojtocase pampa moilhuse para sempa ticholohuase. ⁷Huan huajca monequi anquisase nimantzi tlen campa anmotlatijtose huan anquitzquise nopa altepetl pampa amOTECO Dios anmechmacas amomaco. ⁸Huan quema ya anquitlantose nopa altepetl, xijtlatica quen TOTECO quijtojtoc huan quen na nimechnahuatijtoc.”

⁹Huajca Josué quintitlanqui, huan injuanti yajque huan motlatijque iica altepetl Hai para campa calaqui tonati, tlatlajco altepetl Betel huan Hai. Huan Josué panoc nopa yohuali ipan ichaj tlen yoyomitl campa mocajcahuayayaj nochi nopa israelitame.

¹⁰Hualmostla Josué mejqui nelcualca huan quinsentili isoldados. Huan Josué huan nopa huehue tlacame catli elque inintlayacancahua nopa israelitame tlayacantiyajque para quihuilanati altepetl Hai. ¹¹Huan nochi injuanti nejnentiyaajque huan monechcahuijque iixmelac nopa altepetl ica norte. Huan onca se tlamayamitl tlatlajco campa injuanti mochahuayayaj huan altepetl Hai. ¹²Huan Josué quintitlanqui se macuili mil tlacame para ma motlatica tlatlajco Betel huan Hai quentzi más para campa calaqui tonati. ¹³Huajca sesen yajqui campa monequiyaya; sequin campa temo tonati huan sequin mocajcaytoyaj imelac nopa altepetl ica norte. Huan nopa yohuali Josué mocajqui ipan nopa tlamayamitl.

¹⁴Huan quema nopa tlanahuatijquetl tlen Hai quiitac Josué, moisihiulti huan quisqui tlen itepa nopa altepetl cualca ica isoldados para quinhuilanati nopa israelitame ipan nopa tlamayamitl nechca hue-

yatl Jordán. Pero amo quimatiyayaj para sequinoc israelitame motlatijtoyaj iica ialtepe. ¹⁵Huajca Josué ihuaya isoldados san quichijque para majmahuiyayaj huan cho-lojtejque tlen nopa Hai ehuaní. Huan yajque ipan ojtlí catli panoyaya ipan nopa huactoc tlali campa amo tleno eli. ¹⁶Huan nopa tlanahuatijquetl quinnahuati nochi isoldados catli mocajtoyaj altepetl Hai para ma quitojtocaca Josué. Huan quej nopa, nopa israelitame quinyacunque ma quicajtehuaca inialtepe huan huejca ma yaca. ¹⁷Huan amo mocajqui niyon se tlatcatl ipan Hai o ipan Betel catli amo quintoquili nopa israelitame. Nochi yajque, huan nopa altepetl mocajqui tlapojtoc. Amo aquí mochahuayaya para quimanhuis.

¹⁸Huajca TOTECO quiilhui Josué: “Xixitlahua mocuatlamin catli huehueyac para Hai para xiquinnextili mosoldados ma calaquica ipan nopa altepetl pampa na nimitzmactilis.”

Huan quej nopa Josué quixitlajqui. ¹⁹Huajca injuanti catli motlatijtoyaj nimantzi motlananque huan calajque ipan nopa altepetl. Huan quitlanque huan quitlatijque.

²⁰⁻²¹Huan quema nopa tlacame tlen altepetl Hai moicancuepque, quiitaque poc-tli tlejcoyaya tlen inialtepe hasta ilhuicac. Huan Josué huan nopa israelita soldados catli cholohuayayaj para nopa huactoc tlali moicancuepque huan quiitaque para injuanti catli motlatijtoyaj iica nopa altepetl ya calactoyaj huan quitlatijtoyaj. Huajca nimantzi sempa mocuepque huan quinhuilanacoj nopa tlacame tlen altepetl Hai catli quintoquiliyayaj. Huan nojquiya nopa israelita soldados catli calactoyaj ipan altepetl quisque huan pejque quinhuilanaj nopa Hai ehuaní tlen iniica huan huajca ayacmo cana hueliyayaj cholose. ²²Nopa israelitame quinyahualojque; sequin iniixpa huan sequinoc iniica. Huan nopa israelitame quintlamimictijque nopa altepetl Hai ehuaní huan amo aquí quicajque ma cholo. ²³San quicahuilijque ma itzto nopa tlanahuatijquetl hasta quihui-caque iixpa Josué.

24 Huajca nopa israelitame quintlamimictijque ica machete nochi altepetl Hai ehuan catli quintojtocatinemiyayaj ipan huactoc tlali. Teipa nochi israelitame yajque ipan altepetl Hai huan quintlamimictijque catli mocahuayayaj nozona. 25 Huajca ipan nopa tonal mijque nochi 12 mil tlacame huan sihuame catli itztoyaj ipan Hai, 26 pampa Josué amo quitemohui imax catli quitlananayaya ichoso hasta isoldados quintlamimictijque nochi ipan Hai. 27 Pero nopa israelitame mocuilijque nochi tlapiyalme huan tlamantli catli oncayaya ipan nopa altepetl quen TOTECO quihhuijtoya Josué ma quichihuaca. 28 Huan teipa Josué quitlamitlati nopa altepetl. San mocajqui se tlamontomitl tlen tlasoli campa amo aqui quinequi monechcahuis hasta ama. 29 Huan Josué quicua-huiyoni nopa tlanahuatijquetl tlen Hai ipan se cuahuatl huan nozona mocajqui hasta tiotlac. Huan quema oncalaquiyaya tonati, Josué tlanahuati ma quitemohuica itlacayo huan ma quimajcahuaca nechca campa eltoya nopa puerta para calaquij ipan itepa nopa altepetl. Huan quinihui ma quimontonoca tetl icuitlapa. Huan nopa tlamontomitl tlen teme noja eltoc.

**TOTECO quiompahui icamanal
ica israelitame**

30 Huajca ipan tepetl Ebal Josué quichijqui se tlaixpamitl para TOTECO Dios catli tiisraelitame tijhueyichihuaj. 31 Quichijqui senquistoc quen Moisés, itequipanojca TOTECO, tlanahuatijtoya para ma tijchihuaca. Quichijque nopa tlaixpamitl ica tetl catli amo tlactectli quen ijcuilijtoc ipan nopa tlapohualistli tlen itlanahuatilhua Moisés. Huan nopa israelitame quimacaque TOTECO tlacajcahalistli tlatlatili ipan nopa tlaixpamitl huan nojquiya quimacaque tlacajcahalistli para ma onca tlayol-tlalili ica Toteco. 32 Teipa iniixpa nochi israelitame Josué quijcuilo ipan nopa tetl catli ica quichijtoya nopa tlaixpamitl nopa tlanahuatilme catli Moisés quinmacatoya. 33 Huan nochi israelitame moquetzque iixpa icaxa TOTECO. Tlajco nopa israelitame ijcatoyaj iixmelac nopa caxa ica tepetl

Gerizim iniica ininhuaya ininhuehue masehualhua, inintlayacancahua, ininjueces huan nopa sequinoc altepeme ehuan catli mocajque ininhuaya. Huan nopa seyoc tlajco israelitame ijcatoyaj iixmelac nese lado nopa caxa ica nopa tepetl Ebal iniica, ininhuaya ininhuehue masehualhua, inintlayacancahua, ininjueces huan nopa sequinoc altepeme ehuan catli mocajque ininhuaya. Huan nopa totajtzitzi catli huajque ipan nopa hueyi familia tlen levitame quihuicayayaj nopa caxa huan mocajque tlatlajco nopa israelitame. Quichiya-yayaj para quintiochihuase nopa masehualme. Nochi elqui senquistoc quen Moisés, itequipanojca TOTECO, tlanahuatijtequi huejcajya ma quichihuaca nopa totajtzitzi para ma quintiochihuaca nopa israelitame.

34 Huan teipa Josué quipojqui nochi nopa camanali tlen nopa tlanahuatilme catli TOTECO quinmacatoya. Quipojqui nochi tlatiochihualistli huan nochi tlatelchihualistli catli ijcuilijtoc ipan nopa tlapohualistli catli quipixqui itlanahuatilhua TOTECO. 35 Huan Josué amo quiiyocacajqui niyon se camanali catli quinquatu Moisés. Nochi quipojqui iniixpa nochi nopa israelitame catli itztoyaj nozona. Huan ijcatoyaj nozona nochi israelitame ica sihuame, coneme huan nochi sequinoc altepeme ehuan catli mocajque ininhuaya.

**Gabaón ehuan quincajcayajque
israelitame**

9 Huan nopa tlanahuatiani catli itztoyaj ipan ne seyoc inaliyo hueyatl Jordán para campa temo tonati quicajque catli panoc ica altepetl Jericó pampa nochi masehualme catli itztoyaj iteno nopa hueyi atl Mediterráneo huan hasta nopa tepeme tlen Líbano quimatque. Nozona itztoyaj nochi nopa tlanahuatiani tlen nopa heteos, amorreos, cananeos, ferezeos, heveos huan jebuseos. 2 Huan huajca nochi mo-sentilijque ica san se ininyolo para quihuilanase Josué huan nopa israelitame.

3 Pero injuanti catli itztoyaj ipan altepetl Gabaón quicajque catli Josué quinchihuilijtoya altepeme Jericó huan Hai, 4 huan

pejque moilhuáj quenicatza huelis quincayahuase nopa israelitame para momanahuisse. Huajca quicuique tlamantli catli ayacmo cuali para tlachihuase quen huejca hualayayaj. Quitlalijque huehue coxtali ininpani ininburrojhua. Huan quitlalijque cuetlax bolsas catli nojquiya sosoltic catli ipan quitectoyaj xocomeca atl. ⁵Huan motlalilijque tecaactli sosoltic huan coyontoc. Huan motlalilijque ininyoyohua catli neltantoc. Huan quihuicaque pantzi catli pojyajtoyaya huan huactoc. ⁶Huan ajsicoj campá Josué mocajcahuayaya ipan Gilgal huan quicamanalhujique Josué huan nopa israelita tlayacanani. Quinilhujique:

—Tojuanti tihualahuj nelhuejca. Tihualajtoque para ma timochihuaca tihuapoxme huan ma tijsencahuaca se camanal sencahuali para amo quema timo-huilanase.

⁷Huan nopa israelitame quinnanquilijque nopa Gabaón ehuani:

—Nohueli nechca anitztoque tohuaya huan quej nopa amo hueli amohuaya timocahuase para amo timo-huilanase.

⁸Huan nopa Gabaón ehuani quinnanquilijque Josué:

—Tojuanti timechtequipanose san tlápic.

Huan Josué quinilhui:

—¿Ajqueya amojuanti huan canque anhualahuj?

⁹Huan tlananquilijque:

—Timotequipanojcahua tihualajtoque nelhuejca pampa tijcactoque catli amoteco Dios anmechchiuilijtoc. Tijcactoque tlen ihueyitilis huan nochi nopa tlaxextilijcayotl catli quichijqui ipan tlatl Egipto. ¹⁰Tijcactoque nochi catli quinchihuil nopa ome inintlanahuatijcahua amorreos catli itztoyaj ne seyoc inaliyo hueyatl Jordán; Sehón nopa tlanahuatijquetl tlen Hesbón huan Og nopa tlanahuatijquetl tlen tlatl Basán catli mosehuyiyaya para tlanahuatis ipan altepetl Astarot. ¹¹Huan yeca tohuehue masehualhua huan nochi catli itztoque ipan totlal techilhujque ma tijcuica catli monequi para ipan ojtli huan ma tihualaca timechitaquij. Quinequiyayaj ma timechilhuiquij

para timechtequipanose san tlápic sintla timo-huapoxchihuase. ¹²Huan ni topan-tzi catli tijhualicaque noja totonic tijcui-tejque ipan ojtli. Ama xiquitaca. Ya huactoc huan hasta pojyajtoc. ¹³Ni cuetlax bolsas catli ipan tijtejque xocomeca atl, nojquiya eltoya yancuic quema tijtemitijque huan ama ya tzayantoc. Nojquiya tlá-huel tlantoc toyoyo huan totecac, pampa nelía huejca tinejnentoque.

¹⁴Huan nopa israelitame huan Josué quiyecojque nopa tlacualistli catli quihualicayayaj huan quinneltocaque nopa gabaonitame, pero amo quitlatzintoquilijque TOTECO achitihui tlaque ma quichihuaca. ¹⁵Huajca Josué quichijqui se camanali ininhuaya para mohuapoxchihuase huan quincahuilise ma itztoca. Huan yaya huan nopa tlayacanca israelitame nojquiya quitestigojquetzque TOTECO para amo quinmictisquíaj.

¹⁶Huan quema panotoya eyi tonali, nopa israelitame momacaque cuenta para nopa gabaonitame hualayayaj nechcatzi huan nelía itztoyaj ipan inintlal. ¹⁷Huajca nopa israelitame yajque quintemotaj. Huan ica eyi tonali ajsitoj inialtepehua catli eliyaya Gabaón, Cafira, Beerot huan Quiriat Jearim. ¹⁸Pero nopa israelitame amo quinmictijque, pampa inintlayacancahua quitestigojquetztoyaj TOTECO Dios catli tiisraelitame tijtequipanohuaj para amo tiquinmictisquíaj.

Yeca nopa israelitame pejque ininca camanaltij inintlayacancahua pampa cualanque ica nopa camanali catli quichijque. ¹⁹Pero nopa tlayacanani quinilhujique nopa israelitame:

—Tojuanti tijtestigojquetztoque TOTECO Dios catli tijtequipanohuaj para amo tlano tiquinchihuilise, huan yeca ama amo tlano huelis tiquinchihuilise. ²⁰Monequi tiquincahuase pampa sintla amo tijchihuase catli tijtestigojquetzque TOTECO Dios, yaya tlá-huel cualanis tohuaya.

²¹Huajca nopa tlayacanca israelita tla-came tlanahuatijque ma amo quinmictica nopa Gabaón ehuani pero ma quinqe-quihua quen cuajcuahuini huan asacani. Huan quej nopa quichijque.

22 Huan Josué quinnotzqui nopa gabaonitame huan quinilhui:

—¿Para tlen antechcayajque? Antechilhuijque para huejca amochajchaj, pero nelía nechcatzi anhualahuij. 23 Huajca pampa catli anquichijtoque, Toteco Dios anmechtelchijtoc huan para nochipa antechtequipanose. Monequi ancuatlapanase huan anasacase para itlaixpa ipan ichaj.

24 Huan quinanquilijque Josué:

—Nochi ya ni tijchijque pampa tijmatiyayaj antechmictisquáj. Tijcayque para amoTECO Dios quinahuatijtoya Moisés ma anmechmaca ni tlali huan ma techtzontlamiltica nochi catli tiitztoque nica. Huajca timajmahuiyayaj. 25 Pero tiitztoque momaco; xijchihua catli más cuali tiquita.

26 Huajca Josué amo quincahuili nopa israelitame ma quinmictica nopa gabaonitame. 27 Pero quichijqui ma elica cuajcua huini huan asacani para nopa israelitame huan para itlaixpa TOTECO. Huan hasta ama ya nopa quichihuj nopa gabaonitame ipan nopa lugar campa TOTECO quitlapenijtoc para itlaixpa.

Nopa israelitame quintlanque nopa amorreos

10 Huan quicajqui Adonisedec nopa tlanahuatijquetl tlen altepetl Jerusalén quenecatza Josué quitlantoya altepetl Hai huan quimictijtoya itlanahuatijca. Huan momacac cuenta para quisosolo nochi catli eltoya ipan Hai san se quen quisosolo nochi ipan altepetl Jericó huan quimicti itlanahuatijca. Nojquiya Tlanahuatijquetl Adonisedec quicajqui para nopa gabaonitame quichijtoyaj se camanali ica nopa israelitame huan ama mocahuyayaj ininhuaya. Huajca nelía majmajqui. 2 Huan noja más majmajqui pampa quimatqui Gabaón nelía eliyaya se altepetl hueyi huan quipixqui chichualistli quen nopa altepeme campa mosehuía se tlanahuatijquetl. Nojquiya altepetl Gabaón elqui más hueyi que altepetl Hai, huan nochi aislados nelía mooquichmatiyayaj. 3 Yeca Tlanahuatijquetl Adonisedec quintlanqui itlayolmelajcagua ma yaca qui-

itatij Tlanahuatijquetl Hoham ipan altepetl Hebrón, Tlanahuatijquetl Piream ipan altepetl Jarmut, Tlanahuatijquetl Jafía ipan altepetl Laquis huan Tlanahuatijquetl Debir ipan altepetl Eglón. Huan quinilhui: 4 “Xihualaca nica, techpalehuiquij tijhuilanase altepetl Gabaón pampa inijuanti mohuampoxchijtoque ihuaya Josué huan nopa israelitame.” 5 Huan quej nopa ininsoldados nopa macuilme tlanahuatiani tlen amorreos, (inijuanti nopa tlanahuatiani tlen Jerusalén, Hebrón, Jarmut, Laquis huan Eglón) mosansejcotilijque para quihuilanase Gabaón. Huan yajque huan mocajcayque nechca nopa altepetl para quihuilanatij.

6 Huajca nopa Gabaón ehuan quititlanilijque se amatl Josué campa itztoya ipan Gilgal huan quiyolmelajque: “Amo techtlahuelcahua tojuanti catli timotequipanojcahua. Xihualaca nimantzi techpalehuiquij huan techmanahuiquij, pampa nochi nopa tlanahuatiani catli quinnahuatíaj amorreos campa tlachiquiltipa mosentilijtoque para techhuilanase.”

7 Huajca Josué quisiqui tlen Gilgal ica nochi aislados catli más motemacayayaj. 8 Huan TOTECO quilhui Josué: “Amo xiquinimacasi pampa na nimitzmactilis momaco. Huan amo aqui huelis mohuaya motlalis.”

9 Huan Josué nejnenqui nochi se yohual tlen Gilgal huan quinichtacahuito nopa amorreos. 10 Huan TOTECO quichijqui ma momajmatica iniixpa nopa israelitame huan ma cholojtehuaca. Huan quipalehui Josué ma quinmicti miyac ipan se hueyi tlahuilancayotl nechca Gabaón. Teipa quichijqui para nopa israelitame ma quintojtocatiyaca ne sequinoc ipan nopa tlaixtemolis nechca altepetl Bet Horón. Huan quinpalehui noja ma quinmictijtiyaca nopa amorreos hasta nopa altepeme Azeca huan Maceda. 11 Huan quema nopa amorreos temoque nopa tlaixtemolis nechca Bet Horón para mochololtise tlen nopa israelitame, TOTECO quimajcayqui tesihuitl ininpani tlen ilhuicac catli eliyaya quen huejhueyi teme. Huan TOTECO quinmicti más amorreos ica tesihuitl que

israelitame quinmictijque ica ininmache-
te.

12 Huan quema TOTECO quinmactiliya-
ya nopa amorreos ininmaco israelitame,
Josué quicamanalhui TOTECO iniixpa no-
pa israelitame huan quijto:

“Ma moquetza tonati ipan nopa alte-
petl Gabaón.

Huan ma moquetza metztlí ipan nopa
tlamayamitl Ajalón.”

13 Huajca tonati huan metztlí moquetz-
que,

hasta nopa israelitame quintlanque
inincualancaitacahua.

Huan ya ni huan nochi catli panoc ij-
cuilijtoc ipan nopa tlapohualistli Jaser.
Huan tonati moquetzqui tlatlajco ipan il-
huicactli huan quichixqui nechca se tonal
para oncalaquisquía. 14 Amo quema onca-
toya seyoc tonal quen nopa tonal, niyon
amo quema oncas; pampa TOTECO quitla-
caquili icamanal se tlatatl. Huan TOTECO
nelía tlahuilanayaya para nopa israelita-
me.

15 Teipa Josué huan nopa israelitame
sempa yajque campa mocajcahuayaj
ipan Gilgal.


16 Huan ipan nopa tlahuilancayotl no-
pa macuilti tlanahuatiani cholojque huan
motlatijque ipan se tecacahuatl nechca al-

tepetl Maceda. 17 Pero se acajya quilhui
Josué canque motlatiyayaj. 18 Huajca Jo-
sué tlanahuati: “Xijmimiloca huejhueyi te-
me campa calajque ipan nopa tecacahuatl
huan cuali xijzacuaca. Teipa xiquinca-
huaca soldados nopona ma quimocuitla-
huica para amo huelis quisase. 19 Pero
amojuanti amo ximoquetzaca. Xiquintoj-
tocatiyaca amocualancaitacahua huan xi-
quinhuilanaca ica iniica. Amo xiquinca-
huilica ma calaquica ipan inialtepe, pam-
pa amoTECO Dios anmehmactilijtoc amo-
maco.”

20 Huajca Josué ininhuaya nopa israel-
itame quintlanque nopa amorreos huan
quinmictijque ipan se hueyi tlahuilanca-
yotl. San se ome cholojque huan motlati-
toj ipan altepeme catli tzactoya. 21 Huan
nochi israelita soldados ajsique ica cuali
campa itztoya Josué nechca Maceda cam-
pa mocajcajttoyaj. Huajca amo aqui mote-
macac para ininca camanaltis catli fiero
nopa israelitame.

22 Teipa Josué quijto: “Xijtlapoca nopa
tecacahuatl campa anquintzajque nopa
macuilti tlanahuatiani huan techhualiqui-
lica.”

23 Huajca nopa israelitame quinquixtij-
que tlen nopa tecacahuatl nopa macuilti
tlanahuatiani; nopa tlanahuatijquetl tlen



Josué quinahuati tonati huan metztlí ma motilquetzaca

Jerusalén, Hebrón, Jarmut, Laquis huan Eglón. ²⁴Huan quema quinhualicaque iixpa Josué, quinnotzqui nochi nopa israelita soldados ma monechcahuica. Huan quinhuanuati nopa tlayacanani tlen isoldados, quinihui: “Xiquintlalilij amocxi ininquechtla ni tlanahuatiani.”

Huan quej nopa quichijque. ²⁵Huajca Josué quinihui: “Amo ximajmahuica niyon amo xiyolcuesihuica. Ximotetilica huan ximotemacaca pampa quej ni TOTECO quinchihuilis nochi amocualancaitacahua.”

²⁶Teipa Josué quinmicti nopa tlanahuatiani huan tlanahuati para sesen ma quicua-huiyonica ipan se cuahuatl. Huan quej nopa quincajque hasta quema tiotlaquixqui. ²⁷Huan quema calaquiyaya tonati, Josué tlanahuati ma quintemohuica nopa mijcattziti huan ma quintemaca ipan nopa ostotl catli ipan motlatijtoyaj. Teipa quitzajque nopa tecacahuatl ica huejhueyi teme huan quej nopa noja eltoc hasta ama.

Campa hueli tlatlanque israelitame

²⁸Ipan nopa tonal nojquiya Josué quitlanqui nopa altepetl Maceda huan quitlamisoso. Quinmachetejhui inintlanahuatijca huan nochi catli itztoyaj nozona, huan amo aqui mocajqui itztoc. Quichihui nopa tlanahuatijquetl ipan Maceda san se quen quichihui nopa tlanahuatijquetl tlen altepetl Jericó.

²⁹Huan teipa Josué huan nopa israelitame quisque Maceda huan yajque altepetl Libna quihuilanatoj. ³⁰Huan nojquiya TOTECO quinmactili nopa altepetl ihuaya itlanahuatijca. Huan quinmictijque nochi catli itztoyaj nozona ica machete. Amo aqui mocajqui itztoc, huan quichihuilijque inintlanahuatijca san se quen quichijque ica nopa tlanahuatijquetl tlen Jericó.

³¹Teipa Josué huan nopa israelitame quisque Libna huan qiyahualotoj altepetl Laquis para quihuilanase. ³²Huan hualmostla TOTECO quinmactili altepetl Laquis huan nopa israelitame quinmachetejhuique nochi catli itztoyaj nozona quen quichijtoyaj ipan Libna.

³³Huan quema quihuilanayayaj Laquis, Tlanahuatijquetl Horam ipan altepetl Gezer hualajqui ica isoldados para quimanahuico nopa altepetl, pero Josué nojquiya quitlanqui ya ininhuaya nochi isoldados huan amo aqui quicajqui itztoc.

³⁴Huan quema Josué huan nopa israelita soldados catli itztoyaj ihuaya quisque altepetl Laquis, quiyahualotoj altepetl Eglón para quihuilanase. ³⁵Huan ipan nopa tonal quitlanque nopa altepetl huan quinmachetejhuique nochi catli nozona itztoyaj. Quintlamimictijque quen quichijtoyaj ica Laquis.

³⁶Teipa quistejque altepetl Eglón huan yajque altepetl Hebrón para quihuilanatij. ³⁷Huan quitlanque nopa altepetl huan quinmachetejhuique nopa tlanahuatijquetl huan nochi masehualme catli itztoyaj nozona huan ipan nochi pilaltepetziti nejnechca. Quichijtoyaj san se quen quichijtoyaj ica altepetl Eglón. Huan amo aqui mocajqui itztoc.

³⁸Teipa Josué huan nopa israelita soldados sempa yajque altepetl Debir para quihuilanatij. ³⁹Huan quinmachetejhuique nopa tlanahuatijquetl huan nochi catli itztoyaj ipan nopa altepetl huan ipan nochi ipilaltepehua. Huan amo aqui mocajqui itztoc ipan Debir pampa quintlamimictijque nochi quen quichijtoyaj ipan altepetl Hebrón huan Libna.

⁴⁰Quej nopa Josué quitlanqui nochi nopa tlali huan inintlanahuatijcahua. Ica norte quitlanqui campa nopa tlachiquiltipa, huan ica sur campa nopa huactoc tlali Neguev. Quitlanqui nopa tlamayn tlali campa temo tonati huan nopa tlaixtemolis ica campa hualquisa tonati. Nochi altepepe quitlamisoso huan nochi masehualme quintlamimicti. Amo aqui mocajqui itztoc quen technahuatijtoya TOTECO Dios catli tiisraelitame tijtequipanohuaj.

⁴¹Quintlamitlanqui huan moaxcati nochi nopa tlali tlen Cades Barnea ica sur hasta Gaza campa temo tonati, huan nochi nopa tlali tlen Gosén hasta altepetl Gabaón ica norte. ⁴²Nochi ya ni quichijqui ica se huelta pampa techhuilanili TOTECO Dios catli tiisraelitame tijtequipanohuaj.

43 Huan teipa Josué huan nochi israelita soldados sempa yajque campa mocajcaytoyaj ne sequinoc israelitame ipan tlali Gilgal.

**Josué quitlanqui Jabín
huan catli nechca mocajqui**

11 Quema Tlanahuatijquetl Jabín ipan altepetl Hazor quimatqui ya nopa, tlatitlanqui ma quinyolmelahuatij miyac tlanahuatiani para ma mosentilica ica ininsoldados para san sejco ma quinhuilanati israelitame. Quiyolmelajqui nopa tlanahuatijquetl Jobab tlen tlali Madón huan nojquiya nopa tlanahuatijquetl tlen Simrón huan tlen Acsaf. 2 Nojquiya quinyolmelajqui nochi nopa tlanahuatiani catli itztoyaj ipan tepeme ica norte, huan campa tlamyantipa Arabá ica sur tlen nopa hueyatl Cineret huan campa tepeme nejnechca Dor neca campa calaqui tonati. 3 Quinyolmelajqui nopa tlanahuatiani tlen nopa cananeos ica campa hualquisa tonati huan nopa sequinoc campa calaqui tonati. Nojquiya quinyolmelajqui nopa tlanahuatiani tlen nopa amorreos, heteos, ferezeos huan jebuseos catli itztoque campa tepeme huan nopa tlanahuatijquetl tlen nopa heveos catli itztoque ipan itlaxtemolis tepetl Hermón ipan tlali Mizpa.

4 Huan nochi ni tlanahuatiani quisque ica ininsoldados huan ica miyac tlahuilanca carros huan tlahuel miyac cahuayojme. Itztoyaj tlahuel miyac soldados hasta amo aqui hueliyaya quinpohua pampa nesiayayaj quen imiyaca xali iteno hueyi atl. 5 Nochi injuanti mosentilijque huan mocajque nechca nopa ameli catli itoca Merom para quinhuilanase israelitame.

6 Pero TOTECO quiilhui Josué: “Amo xiquinimacasi pampa mostla quen ama ni hora na ya nimehmictilijtos nochi injuanti. Huan anquitequise se iniicxitlalo inincahuayos para amo motlalose huan anquitlatise inintlahuilanca carros.”

7 Huajca Josué huan nochi isoldados quinichtacahuilanatoj nechca hueyatl Merom huan pejque quinhuilanaj. 8 Huan TOTECO quintemactili ininmaco nopa israelitame, huan quinhuilanque huan quintojtoca-

tiyajque hasta nopa Hueyi Altepetl Sidón huan hasta Misrefot Maim. Huan para campa hualquisa tonati quintepotztocaque hasta nopa Tlamaya tlen Mizpa, huan niyon se amo mocajqui itztoc. 9 Huan Josué quichijqui quen TOTECO tlanahuatijtoya huan quitejque se iniicxitlalo inincahuayos huan quitlati inintlahuilanca carros.

10 Teipa quema sempa yohuiyaya Josué ichaj, quitlanqui altepetl Hazor, huan quimicti itlanahuatijca. (Achthui altepetl Hazor elqui catli quipixqui tequiticayotl ica nochi sequinoc altepeme ipan nochi ni tlalme.) 11 Huan quinmicti ica machete nochi catli nopona itztoyaj huan quitlatijque nopa altepetl. 12 Huan teipa Josué quinhuilanqui nochi nopa altepeme catli iniacahua nopa tlanahuatiani catli mosentilijtoyaj para tlahuilanase. Quintlanqui nopa altepeme huan quinmicti nochi catli itztoyaj nopona quen tlanahuati Moisés, itequipanojca TOTECO, huejcayja ma quichihuaca. 13 Pero nopa israelitame amo quitlatijque niyon se altepetl catli quichijtoyaj ipan tetl. San Hazor, quena, quitlatijque. 14 Quintlamimictijque catli itztoyaj ipan nopa altepeme huan moaxcatijque nochi tlapiyalme huan tlamantli catli oncayaya. Niyon se masehuali amo mocajqui itztoc.

Josué quichijqui catli Moisés quinahuati

15 Nochi tlanahuatilme catli TOTECO quinahuatijtoya Moisés ma quichihuaca, Moisés quipanoltijtoya ica Josué para ma quichihua. Huan senquistoc nochi nopa tlanahuatilme Josué quichijqui. Josué amo quiyocacajqui niyon se tlanahuatili catli TOTECO quinahuatijtoya Moisés. 16 Huan Josué quitlanqui nochi nopa tlali campa hueli. Quitlanqui nopa tlali campa tepeme, campa huactoc tlali Neguev, nochi tlali Gosén, nochi nopa tlamayamitl nechca atl, nochi tlali Arabá, huan nochi nopa tepeme huan tlamyantipa catli ama eltoc ipan tlali Israel. 17 Mocuilijttoyaj inintlal ica inepa catli pehua ipan tepetl Halac nechca Seir ica sur huan yohui hasta Baal Gad ipan nopa Tlamayamitl Líbano ica norte catli mocahua itzintla tepetl

Hermón. Huan Josué quinitzqui huan quinmicti nochi tlanahuatiani ipan nopa tlali, ¹⁸masque huejcajqui para quinhui-lantinenqui. ¹⁹San ica nopa heveos tlen altepetl Gabaón quichijque se cananali, pero nochi sequinoc heveos quinmictij-que. ²⁰Pampa TOTECO quinyoltetili inin-cualancaitacahua para ma motzontochon-chihuaca huan ma quinhuihanatij nopa israelitame. Huan teipa nopa israelitame quintzontlamiltijque huan amo quipixque ininyolo ininhuaya quen TOTECO quina-huatijtoya Moisés ma quichihuaca.

²¹Ipan nopa tonali Josué yajqui quin-tzontlamiltito nopa masehualme huejca-pantique catli eliyayaj iteipan ixhuihua An-ac huan itztoyaj ipan tepetl Hebrón, Debir, Anab huan ipan nochi tepeme campa ama tlali Judá huan tlali Israel. Quinmicti huan quinsemanili inialtepehua. ²²Huan quej no-pa amo mocajqui niyon se huejcapantic ma-sehuali ipan inintlal nopa israelitame. San, quena, sequin mocajque ipan tlali Gaza, Gat huan Asdod. ²³Huajca quej nopa Josué qui-tlanqui nochi nopa tlali quen TOTECO quiil-huijtuya Moisés. Huan Josué quinmajmacac nopa israelitame nopa tlali para iniaxca quen TOTECO quijjto. Quinmajmacac sesen tlen nopa hueyi familias quen imiyaca ite-ipan ixhuihua. Huan teipa, quena, oncac tlaseseltili ipan nopa tlali huan ayacmo on-cac tlahuilancayotl.

**Nopa tlanahuatiani
catli quintlanqui Moisés**

12 Ipan ne seyoc inaliyo hueyatl Jordán, Moisés quinyacantoya nopa israelitame ma quintlanica Sehón, inintlana-huatijca amorreos catli itztuya ipan altepetl Hesbón, huan Og, nopa tlanahuatijquetl tlen altepetl Basán. Yeca quitlanque nopa tlali tlen nopa tlamayamitl Arnón huan tlen nochi nopa tlamayamitl nechca hueyatl Jordán hasta nopa tepetl Hermón ipan norte.

²Huan Sehón catli elqui tlanahuatijquetl tlen nopa amorreo masehualme quinahuati-yaya nopa tlajco tlen tlali Galaad catli mo-cajqui ipan sur. Nopa tlali mocajqui tlatlaj-co nopa tlamayamitl nopa hueyatl Jaboc ica norte huan nopa tlamayamitl tlen hueyatl

Aroer ipan sur. Nopa hueyatl Jaboc elqui ininnepa inintlal nopa amonitame. Huan ica sur, pero quentzi más para campa hual-quisa tonati, inepantipa Sehón ajsic hasta nopa altepetl Aroer ipan iteno nopa tlamayamitl Arnón. Huan ica sur, pero quentzi más para campa temo tonati inepa ajsic has-ta nopa altepetl ipan nopa tlamayamitl tlen hueyatl Arnón catli mocahua tlatlajco alte-petl Aroer huan nopa Hueyi Atl Mictoc. ³Inepa Tlanahuatijquetl Sehón ica campa temo tonati elqui nopa tlamayamitl nechca hueyatl Jordán catli pejqui ica norte ipan nopa hueyi mantoc atl catli itoca Cineret huan ontlami ica sur campa nopa Hueyi Atl Mictoc. Nojquiya mocajqui ipan itlal Tlana-huatijquetl Sehón nopa tlali catli pejqui ica nopa Hueyi Atl Mictoc huan yajqui para campa hualquisa tonati hasta altepetl Bet Jesimot catli mocahua itzintla tepetl Pisga.

⁴Huan Moisés huan nopa israelitame nojquiya quitlanque Og, nopa tlanahuatij-quetl tlen Basán. Tlanahuatijquetl Og el-qui iyajtzi tlen nopa huejcapantique ma-sehualme catli inintoca refaitame. Huan yaya mosehui para tlanahuatis ipan alte-peme Astarot huan Edrei. ⁵Huan itlal Og quipixqui nopa tepetl Hermón, Salca, huan nochi nopa tlali Basán. Huan itlal yajqui hasta inepantipa Gesur huan Ma-aca campa temo tonati, huan ica sur qui-pixqui tlajco tlali Galaad campa inepanti-pa quiajsic itlal Sehón catli achtihui eliya-y tlanahuatijquetl ipan altepetl Hesbón.

⁶Moisés ihuaya nopa israelitame quin-tlantoyaj ni tlanahuatiani, huan Moisés quinmacac ni tlalme nochi iteipan ixhui-hua Rubén, Gad, huan tlajco iteipan ixhui-hua Manasés.

**Nopa tlanahuatiani
catli quintlanqui Josué**

⁷Huan Josué huan nopa israelitame quintlanque ni tlanahuatiani tlen nimitzil-huis catli itztoyaj ipan tlalme tlen nopa hueyatl Jordán hasta campa calaqui tona-ti. (Ni tlali pejtéhua Baal Gad ipan Itlama-ya Líbano huan ontlantoc ipan tepetl Ha-lac catli tlejco hasta tepetl Seir.) Huan Jo-sué quinmajmacac israelitame ni tlali

quen ininmiyaca iteipan ixhuihua tlen sen hueyi familia quipixqui. ⁸Ni tlali quipixqui nopa tepeme, nopa tlamayamitl nechca hueyatl Jordán, nopa Arabá, nopa tlaixtemolis, nopa huactoc tlali campa amo tleno eli huan nopa Neguev. Ni tlamme eltoya iniaxca nopa heteos, amorreos, cananeos, ferezeos, heveos huan jebuseos.

⁹Nopa tlanahuatiani catli Josué huan nopa israelitame quintlanque elque nopa tlanahuatiani tlen ni altepeme:

Jericó, Hai catli eltoya nechca Betel,

¹⁰ Jerusalén, Hebrón,

¹¹ Jarmut, Laquis,

¹² Eglón, Gezer,

¹³ Debir, Geder,

¹⁴ Horma, Arad,

¹⁵ Libna huan Adulam,

¹⁶ Maceda, Betel,

¹⁷ Tapúa, Hefer,

¹⁸ Afec, Sarón,

¹⁹ Madón, Hazor,

²⁰ Simron Merón, Acsaf,

²¹ Taanac, Meguido,

²² Cedec, Jocneam ipan Carmelo,

²³ Dor ipan tlali Dor,

Goim ipan tlali Gilgal,

²⁴ huan nojquiya nopa tlanahuatijquetl ipan altepetl Tirsá.

Elque 31 tlanahuatiani para nochi catli Josué huan nopa israelitame quintlanque.

Nopa tlamme catli polihui quitlanise israelitame

13 Huan quema Josué ya eliyaya huehuentzi, TOTECO quiihui: “Ta ya tihuehuentzi huan noja mocahua miyac tlamme para anquitlanise. Ya ni catli polihui:

²Nochi inintlal nopa filisteos, nochi inintlal nopa gesureos, ³nochi nopa tlali catli ama iniaxca nopa cananeos catli pehua campa temo tonati ica hueyatl Sihor ipan inepantipa tlali Egipto huan ica norte yohui hasta inepantipa tlali Ecrón. Nojquiya polihui nopa macuili altepeme tlen nopa filisteos: Gaza, Asdod, Ascalón, Gat huan Ecrón. Huan ica sur polihui nopa tlali tlen nopa aveos, ⁴huan ica sur, nochi inintlal cana-

neos ica nopa altepetl Mehara catli nelía eliyaya iniaxca nopa sidonios huan nochi nopa tlali ica norte hasta Afec campa inepa inintlal nopa amorreos. ⁵Nojquiya polihui inintlal nopa giblita-me ica nochi tlali Líbano para campa hualquisa tonati. Nopa tlali pehua ica altepetl Baal Gad itzintla tepetl Hermón huan yohui hasta campa se hueli calaqui ipan Hamat ica norte.

⁶“Nojquiya polihui nochi inintlal nopa sidonios catli itztoque ipan nopa tepeme tlatlajco Líbano huan Misrefotmáim.

“Na niquintojtocas nochi ni masehualme amoixpa anisraelitame. Huajca monequi nojquiya anmoilhuse quenicatza anquimajmacase nochi ni tlamme quen nimitznahuatijtoc. ⁷Xixelo ni tlali ica nopa chicnahui huejhueyi familias catli ayamo quiselijtoque tlali huan ica ne seyoc tlajco nopa hueyi familia Manasés catli amo quiselijtoc.”

Inintlal Manasés, Rubén huan Gad

⁸Nopa hueyi familia Rubén huan Gad, huan tlajco nopa hueyi familia Manasés ya quiselijque inintlal pampa Moisés, itequipanojca TOTECO, quinmacac nopa tlali catli quintocarohua nozona ipan ne inalio hueyatl Jordán para campa hualquisa tonati.

⁹Inintlal ajsi ica sur huan campa hualquisa tonati hasta altepetl Aroer iteno nopa hueyatl Arnón. Nojquiya quiyiya nopa altepetl tlatlajco nopa tlamayamitl Arnón, huan quiyiya nochi nopa tlamayamitl tlen altepetl Dibón campa sur hasta altepetl Medeba más ica norte. ¹⁰Huan inintlal ajsi ica campa hualquisa tonati hasta ininneapolis Amón. Inintlal quiyiya nochi nopa altepeme catli nopa Tlanahuatijquetl Sehón tlen nopa amorreos quinahuati tlen campa mosehui para tlanahuatis ipan altepetl Hesbón. ¹¹Nopa tlali nojquiya quiyiya Galaad, inintlal nopa gesureos huan maacateos. Quiyiya nochi nopa tepetl Hermón huan nochi tlali Basán catli ontlantoc hasta Salca, ¹²huan nochi itlanahuatilis Og, nopa tlanahuatijquetl tlen tlali Basán ca-

tli mosehui para tlanahuatis ipan altepetl Astarot huan Edrei. (Huan Og eliyaya nopa iyoytzi huejcapantic refaita tlatcatl catli mocajqui pampa Moisés quinhuilantoya huan quinmictijtoya.)
 13 Pero nopa israelitame amo quintoj-tocaque nopa gesureos huan maacateos, huan yeca inijuanti itztoque ininhuaya israelitame hasta ama.

Inintlal iteipan ixhuihua Leví

14 Quema quinmajmacayaya nopa huej-hueyi familias inintlal, amo tleno quiselijque iteipan ixhuihua Leví. Monequiyaya nopa levitame quiselisquíaj nochi nopa tla-cajcahualistli tlatlatili catli israelitame quitencahuasquíaj iixpa TOTECO Dios. Huan TOTECO quinahuati para nopa tla-cajcahualistli elisquía iniaxca ipatlaca se tlali.

Inintlal iteipan ixhuihua Rubén

15 Ya ni nopa tlali catli Moisés quimacac nopa hueyi familia Rubén quen imiyaca imasehualhua.

16 Quimacac nopa tlali catli pehua altepetl Aroer ipan iteno nopa tlamayamitl Arnón, huan nopa altepetl catli el-toc tlatlajco nopa tlamayamitl ihuaya nochi nopa tlamayamitl nechca Medeba.
 17 Huan inintlal quiapiya altepetl Hesbón huan nochi pilaltepertzitzi catli eltoc ipan nopa tlamayamitl. Nopa pilaltepertzitzi eliyaya Dibón, Bamot Baal, Bet Baal Meón, 18 Jahaza, Cademot, Mefaat, 19 Quiri-ataim, Sibma huan Zaret Sahar catli moca-hua ipan nopa tepetl ipan nopa hueyi tlamayamitl. 20 Inintlal nojquiya quiapiya altepeme: Bet Peor, Bet Jesimot, nopa tlaixtemolis ipan tepetl Pisga, 21 huan nochi nopa altepeme catli eltoc ipan tlamayamitl. Huan quiapiya nochi itlanahuatilis Sehón inintlanahuatijca nopa amorreos catli mosehui para tlanahuatis ipan altepetl Hesbón. Moisés quintlantoya Sehón huan nopa tlayacanani ipan Madián catli itztoyaj ipan itlal huan quipalehuiyayaj. Inintoca eliyaya Eví, Requiem, Zur, Hur huan Reba. 22 Nojquiya nopa israelitame quimictijque Balaam, nopa tetonal tlachilijquetl catli elqui ico-

ne Beor. 23 Huan nochi nopa tlali catli quiseli nopa hueyi familia Rubén tlanqui campa iteno hueyatl Jordán. Huan quiselijque nopa altepeme huan pilaltepertzitzi catli mocajqui ipan nopa tlali nopa familias catli iteipan ixhuihua Rubén.

Inintlal iteipan ixhuihua Gad

24 Ya ni nopa tlali catli Moisés quimacac nopa hueyi familia Gad quen ininmiyaca imasehualhua.

25 Quimacac altepetl Jazer, huan nochi nopa altepeme ipan tlali Galaad huan tla-jco inintlal nopa amonitame catli ajsic hasta nopa seyoc altepetl Aroer catli moca-hua nechca altepetl Rabá pero quentzi más para campa hualquisa tonati. 26 Huan nojquiya quiselijque nopa tlali catli pejqui ipan altepetl Hesbón huan yajqui hasta altepeme Ramat Mizpa huan Betonim, huan catli pehua ica altepetl Mahanaim huan yohui hasta inepa Debir. 27 Huan ipan nopa tlamayamitl nechca hueyatl Jordán nopa hueyi familia Gad nojquiya quiselijque altepeme Bet Aram, Bet Nimra, Sucot, Zafón huan nopa tlali catli moca-huayaya catli eliyaya iaxca Sehón, nopa tlanahuatijquetl ipan altepetl Hesbón. Huan inintlal Gad ica campa temo tonati ajsic hasta iteno hueyatl Jordán huan yajqui ica norte hasta nopa mantoc atl Cineret. 28 Nochi ni altepeme ica ininpilaltepertzitzi quintocaro nopa familias catli itztoyaj iteipan ixhuihua Gad.

Inintlal tla-jco iteipan ixhuihua Manasés

29 Huan ya ni nopa tlali catli Moisés quimacac nopa tla-jco hueyi familia Manasés quen imiyaca ifamilias.

30 Quintocaro nochi nopa tlali catli achtihui eliyaya iaxca Tlanahuatijquetl Og ipan tlali Basán. Inintlal pejqui ica altepetl Mahanaim huan quipixqui nochi setenta pilaltepertzitzi catli Jair achtihuiya quitlantoya ipan tlali Basán. 31 Nojquiya quipixqui tla-jco tlali Galaad huan nopa altepeme Astarot huan Edrei campa mosehui Tlanahuatijquetl Og para

tlanahuatis. Nochi ni tlali elqui iniaxca iteipan ixhuihua Maquir catli elqui icone Manasés huejcajya huan quinmajmacac quen ininmiyaca ininfamilias.

³²Huajca nochi ya ni nopa tlalme catli Moisés temacac ipan itlamayantipa tlali Moab ipan iteno hueyatl Jordán campa hualquisa tonati imelac Jericó ipan seyoc anali. ³³Pero Moisés amo quinmacac iteipan ixhuihua Leví niyon se inintlal. Pero ipatlaca se inintlal quinilhui quintocarohua para quiselise TOTECO toDIOS tiisraelitame quen iniaxca huan amo tlali.

Quinxexjelhuilijque nopa tlali ipan Canaán

14 Ya ni nopa tlalme ipan tlali Canaán catli quinxexjelhuilijque nopa israelitame ipan nopa chichnahui huan tlajco huejhueyi familias catli ayamo quiseliyayaj catli quintocarohua. Huan Josué, nopa hueyi totajtzi Eleazar, huan nopa tlayacanquetl ipan sesen hueyi familia quipixque nopa tequitl para quinmajmacase nopa tlali. ²Achthui mahuiltijque ica piltetzitzi huan ica ya nopa TOTECO quinexti tlaque hueyi familia quiselisquía sesen tlali, pampa quej nopa TOTECO quinahuatijtoya Moisés ma quichihua. ³Huan ipan seyoc inaliyo hueyatl Jordán para campa hualquisa tonati, Moisés ya quinmacatoya tlali nopa huejhueyi familias Rubén huan Gad huan tlajco nopa hueyi familia Manasés. Pero nopa levitame amo quinmacac tlali. ⁴Pampa José quipixqui ome itelpocahua huejcajya catli inintoca Manasés huan Efraín, huan injuanti mochijque ome huejhueyi familias ipatlaca iteipan ixhuihua Leví catli amo quinpojqui ininhuaya nopa ¹² huejhueyi familias. Huan nopa tlayacanani amo quinmacaque iteipan ixhuihua Leví se tlali. San quinmacaque altepeme para ipan itztose ica quentzi potrerros nechca para quiniscaltise tlapiyalme. ⁵Huajca nopa israelitame quixelojque nopa tlali quen TOTECO quinahuatijtoya Moisés.

Caleb tlajtlanqui se itlal

⁶Se tonal sequin iteipan ixhuihua Judá yajque campa Josué ipan Gilgal. Huan se

tlen injuanti catli itoca Caleb catli elqui itelpoca Jefone huan iixhui Genez quiilhui Josué: “Xiquelnamiqui catli TOTECO quiilhui Moisés ipan Cades Barnea tlen ta huan na. ⁷Na nijpiyayaya ²⁰ xihuitl quema Moisés nechtitlanqui Cades Barnea ma tijtlachilitij nopa tlali catli TOTECO techmacasquía. Huan quema sempa nihualajqui, niquilhui catli nijmatqui ipan noyolo para melahuac. ⁸Pero injuanti catli yajque nohuaya quichijque ma momajmatica nopa masehualme. Quinilhuijque amo huelis tijtlanise. Pero na nijtoquili TOTECO Dios ica nochi noyolo. ⁹Huajca Moisés quitestigojquetzqui TOTECO huan nechilhui: ‘Nochi nopa tlali catli ipan tinejntoc elis moaxca ta huan moixhuihua para nochipa, pampa timotemachi ipan TOTECO Dios ica nochi moyolo.’

¹⁰“Quej nopa nechilhui. Ya nopa quipiya ⁴⁵ xihuitl. Huan quen quijto TOTECO nechcahuilijtoc ma niitzo nochi nopa xihuitl quema tiisraelitame tinemiyayaj ipan huactoc tlali huan hasta ama. Huan ama xiquita, ya nijpixtoc ⁸⁵ xihuitl. ¹¹Huan noja nijpiya chichahualistli quen quema Moisés nechtitlanqui ma nijtlachiliti ni tlali. Huan noja hueli ninejnemi cuali huan nitlahuilana quen ipan nopa tonal. ¹²Huajca nimitztajtlanía, techmaca nopa tepoyo catli TOTECO nechilhui nechmacasquía ipan nopa tonal. Tiquelnamiqui nepa tiquinpantijque iixhuihua nopa huejcapantic tlatcatl Anac. Huan nozona oncac huejhueyi altepeme catli tzactoc ica tepamitl cuali tlachihuali, pero sintla TOTECO nechpalehuis, niquintojtocas quen ya techilhuijtoc ma tijchihuaca.”

¹³Huajca Josué quitiocijqui Caleb, huan quinmacac nopa altepetl Hebrón para elis iaxca huan iniaxca iteipan ixhuihua. ¹⁴Yeca nopa tlali eltoc iaxca Caleb huan iteipan ixhuihua hasta ama, pampa ica nochi iyolo Caleb quitoquili TOTECO Dios catli tiisraelitame tijtequipanohuaj. ¹⁵Achthui Hebrón itoca eliyaya Quiriat Arba (Quiriat Arba quinequi quijtos “ialtepe Arba”), pampa Arba elqui nopa tlatcatl catli más hueyi ipan nopa anaceo masehualme.

Huan tlanqui nochi tlahuilancayotl, huan oncac flasehuilistli ipan nopa tlali.

—Nijnequi para ma nesi techtiochjtoc, techmaca seyoc nemaclti. Nopa tlali catli techmacatoc huactoc huan amo tleno hue-li eli nopona, huajca nojquiya techmactili se tlali ica se ome ameli.

Huajca Caleb quimacac nopa ameli catli eltoc ica norte huan catli eltoc ica sur.

Inialtepehua iteipan ixhuihua Judá

20 Nica nimitzilhuis nopa altepeme catli iteipan ixhuihua Judá quiselijque.

21 Ica sur nechca EDOM quiselijque ni altepeme:

Cabseel, Edar, Jagur, 22 Cina, Dimona, Adada, 23 Cedes, Hazor, Itnán, 24 Zif, Telem, Bealot, 25 Hazor Hadata, Queriot, Hezrón (catli nojquiya itoca Hazor), 26 Amam, Sema, Molada, 27 Hazar Gada, Hesmón, Bet Pelet, 28 Hazar Sual, Beerseba, Bizotia, 29 Baala, Iim, Esem, 30 Eltolad, Qesil, Horma, 31 Siclag, Madmana, Sansana, 32 Lebaot, Silhim, Aín huan Rimón. Huajca elqui 29 altepeme huan ininpilaltepetzitzi.

33 Ipan tlamayamitl quiselijque ni altepeme:

Estaol, Zora, Asena, 34 Zanoa, En Ganim, Tapúa, Enam, 35 Jarmut, Adulam, Soco, Azeca, 36 Saaraim, Aditaim, Gedera huan Gederotaim. Huajca elqui 14 altepeme huan ininpilaltepetzitzi ipan tlamayamitl.

37 Huan nojquiya ipan tlamayamitl elqui ni altepeme: Zenán, Hadasa, Migdal Gad, 38 Dileán, Mizpa, Joctel, 39 Laquis, Boscat, Eglón, 40 Cabón, Lahmam, Quitlis, 41 Gederot, Bet Dagón, Naama huan Maceda. Huajca ya ni elqui 16 altepeme ica ininpilaltepetzitzi.

42 Nojquiya Libna, Eter, Asán, 43 Jifita, Asena, Nezib, 44 Keila, Aczib huan Maresa. Huajca mochijqui chicnahui altepeme huan ininpilaltepetzitzi.

45 Nojquiya quiselijque Ecrón huan nochi nopa altepeme huan nopa pilaltepetzitzi nechca. 46 Huan tlen altepetl Ecrón inepa tlali Judá yajqui hasta nopa Hueyi Atl Mediterráneo huan quipixqui nochi nopa altepeme nechca al-

tepetl Asdod ica ininpilaltepetzitzi. 47 Huajca nopona Judá quipixqui altepetl Asdod ica ipilaltepetzitzi huan Gaza ica ipilaltepetzitzi huan nochi tlali hasta hueyatl Egipto ica sur huan hasta iteno nopa Mediterráneo hueyi atl.

48 Campa tepeme quiselijque ni altepeme ica nochi ininpilaltepetzitzi:

Samir, Jatir, Soco, 49 Dana, Quiriat Sana (catli nojquiya itoca Debir), 50 Anab, Estemoa, Anim, 51 Gosén, Holón huan Gilo. Huajca ya ni mochijqui 11 altepeme ica ininpilaltepetzitzi.

52 Huan quiselijque Arab, Duma, Esán, 53 Janum, Bet Tapúa, Afeca, 54 Humta, Quiriat Arba (catli nojquiya itoca Hebrón), huan Sior. Huajca ya ni mochijqui chicnahui altepeme ica ininpilaltepetzitzi.

55 Nojquiya quiselijque Maón, Carmel, Zif, Juta, 56 Jezreel, Jodeam, Zanoa, 57 Caín, Gabaa, Timna. Huajca ni mochijqui majtlaclti altepeme huan ininpilaltepetzitzi.

58 Nojquiya quiseli Halhul, Bet Sur, Gedor, 59 Maarat, Bet Anot, Eltecón. Huajca ya ni mochijqui chicuase altepeme huan ininpilaltepetzitzi.

60 Nojquiya quiselijque altepeme Quiriat Baal (catli nojquiya itoca Quiriat Jearim) huan Rabá ihuaya ininpilaltepetzitzi. Huajca ya ni mochijqui ome altepeme.

61 Ipan nopa huactoc tlali quiselijque ni altepeme:

Bet Arabá, Midín, Secaca, 62 Nibsán, nopa catli itoca Altepetl tlen Istatl huan Engadi. Huajca mochijqui chicuase altepeme huan ininpilaltepetzitzi.

63 Pero iteipan ixhuihua Judá amo huelqui quitojtocaque nopa jebuseos catli itztoyaj ipan altepetl Jerusalén. Huajca jebuseos noja itztoque nopona ininhuaya iteipan ixhuihua Judá hasta ama.

Inintlal iteipan ixhuihua José

16 Huan nopa sorteo quinexti para iteipan ixhuihua itelpocahua José ma quiselica se tlali catli quipixqui inepa ica sur.

Pejtejqui ica iteno hueyatl Jordán campa altepetl Jericó huan quentzi más para campa hualquisa tonati tlen ameli Jericó. Huan innepa teipa panoc ipan huactoc tlali huan yajqui ica norte tlen Jericó hasta nopa tepeyo Betel. ²Huan tlen Betel catli nojquiya quihuíaj Luz panoc hasta Atarot ipan inintlal arquítame. ³Teipa innepa yohui para campa temo tonati hasta inintlal nopa jafletitame huan hasta inepa Bet Horón Catli Tlatzintla huan hasta Gezer. Huan teipa yohui hasta nopa Mediterráneo hueyi atl.

⁴Huajca nopa ome huejhueyi familias, Manasés huan Efraín, quiselijque ni tlali para iniaxca. Nochi inijuanti iteipán ixhuihua José catli huejcajya itztoya.

Inintlal iteipán ixhuihua Efraín

⁵Ama nimechilhuis catlique tlali quiselijque iteipán ixhuihua Efraín.

Innepa ica campa hualquisa tonati pejtehua ica altepetl Atarot Adar huan yajqui hasta Bet Horón Catli Huejcapa, ⁶huan teipa yohui hasta Hueyi Atl Mediterráneo campa temo tonati. Huan innepa ica norte pehua nozona ipan nopa hueyi atl, huan yohui para campa hualquisa tonati hasta Micmetat ica norte huan pano hasta Taanat Silo huan Janoa. ⁷Huan inepa quisa Janoa, huan yohui ica sur hasta Atarot huan Naarat, huan pano iteno altepetl Jericó huan onquisa campa hueyatl Jordán. ⁸Huan nopa nepamitl ica norte catli elqui más para campa temo tonati pehua ica Tapúa huan quitoquili nopa pilatlajtzi catli itoca Caná para campa temo tonati hasta nopa Hueyi Atl Mediterráneo. Huan ya ni elqui nopa tlali catli quiselijque iteipán ixhuihua Efraín huan ihueyaca nopa tlali elqui quen imiyaca ininfamilias. ⁹Nojquiya Efraín iteipán ixhuihua quiselijque sequin altepeme ipan nopa tlali catli quintocaro nopa tlajco hueyi familia Manasés.

¹⁰Pero iteipán ixhuihua Efraín amo huelque quintojtocaj nopa cananeos

catli itztoque ipan altepetl Gezer. Yeca nopa cananeos noja itztoque ininhuaya israelitame huan quintequipanohuaj.

Inintlal ne seyoc tlajco

nopa hueyi familia Manasés

17 Ama nimechilhuis catlique tlali quiselijque iteipán ixhuihua Manasés catli elqui iachtihui ejca cone José huejcajya. Manasés huejcajya quipixqui iachtihui ejca catli itoca eliyaya Maquir. Huan Maquir cuali quimatqui tlahuilana. Huan Maquir ihuaya itelpoca Galaad huan iniixhuihua ya quiselijtoyaj inintlal ipan seyoc nali Jordán para campa hualquisa tonati catli ama itoca nopa tlali Galaad huan tlali Basán. ²Huajca ama ipan ni inaliyo Jordán para campa temo tonati san quixelohuayayaj tlali ica iteipán ixhuihua Manasés catli quisque tlen itelpocahua catli inintoca eliyaya Abiezer, Helec, Asriel, Siquem, Hefer, huan Semida. Ya ni inintoca itlaca ixhuihua Manasés, icone José, huan sesen quipixqui miyac ininteipán ixhuihua.

³Pero se iteipán ixhui Manasés catli itoca Zelofehad amo quipixqui niyon se oquichpil. Zelofehad elqui icone Hefer huan iixhui Galaad, huan iteipán ixhui Maquir catli elqui icone Manasés huejcajya. Zelofehad san quinpixqui macuilti ichpocame catli inintoca eliyaya Maala, Noa, Hogla, Milca huan Tirsa. ⁴Huan nopa ichpocame yajque iniixpa totajtzi Eleazar huan Josué, icone Nun, huan quinilhuijque: “TOTECO quinahuati Moisés ma techmactili tlali quen quiselisquáj sequinoc ixhuime ipan tohueyi familia.”

Huajca quen TOTECO tlanahuatijtoya, Josué quinmacac tlali quen imiyaca catli quiselijque inintiojhua.

⁵Huajca iteipán ixhuihua Manasés quiselijque majtlaclti huejhueyi talme. Iyoca nojquiya quintocaro nopa talme Galaad huan Basán catli mocahua ipan seyoc inaliyo Jordán para campa hualquisa tonati, ⁶pampa ni ichpocame catli iteipán ixhuihua Manasés nojquiya quiselijque tlali para iniaxca ica tlacame catli iteipán ixhuihua.

7 Huan nopa tlali catli quintocaro iteipan ixhuihua Manasés quipixqui inepa ica norte huan quentzi más para campa temo tonati catli pejqui ica itlal hueyi familia Aser. Huan itlal Manasés yajqui tlen inepa ica Aser ica sur hasta altepetl Micmetat catli elqui iixmelac Siquem para campa hualquisa tonati. Huan tlen Micmetat inepa yajqui ica sur hasta nopa tlali campa itztoyaj Tapúa ehuaní. ⁸(Nopa tlali Tapúa eliyaya iaxca Manasés, pero altepetl Tapúa eliyaya iniaxca iteipan ixhuihua Efraín masque mocajqui ipan inepa itlal Manasés.) ⁹⁻¹⁰Teipa inepa Manasés quitokili iteno ica norte tlen nopa pilatlajtzi Caná huan onquisayaya hasta nopa Hueyi Atl Mediterráneo. (Sequin altepeme catli mocahuayaya ica sur tlen nopa pilatlajtzi eliyaya iaxca nopa hueyi familia Efraín masque mocajqui ipan itlal Manasés.) Huajca itlal Efraín eltoya iteno ica sur. Huan ica norte iteno eltoya inintlal iteipan ixhuihua Manasés huan nopa hueyi atl eltoya ininnepa ica campa temo tonati. Huan ininnepa Manasés ica norte huan quentzi para campa temo tonati monepantía ihuaya inintlal iteipan ixhuihua Aser. Huan ica norte huan quentzi para campa hualquisa tonati monepantía ihuaya inintlal iteipan ixhuihua Isacar.

¹¹Huan iteipan ixhuihua Manasés nojquiya quiselijque altepeme ipan inintlal nopa huejhueyi familias Isacar huan Aser. Huan nopa altepeme inintoca Bet Seán, Ibleam, Dor (catli eltoya ateno), Endor, Taanac huan Meguido. Huan ica sese altepetl nojquiya quiselijque nochi ininipaltepertzitzi catli quiyahualo.

¹²Pero iteipan ixhuihua Manasés amo huelque moaxcatise nochi nopa altepeme pampa cananeos mocajque nopona huan amo huelque quitojtoaque. ¹³Pero teipa quema nopa israelitame quentzi más motlananque, quinchihualtijque nopa cananeos ma quintequipanoca san tlapic; pero amo nelía quitojtoaque.

Inintlal iteipan ixhuihua José

¹⁴Huan iteipan ixhuihua José catli nojquiya itztoyaj ininteipan ixhuihua Manasés huan Efraín yajque quicamanalhuitoj Josué huan quihhuijque:

—¿Quenque techmacac san se piltlaltzi huan TOTECO techtiochijtoc hasta timiyakuí?

¹⁵Huan Josué quinnanquili:

—Sintla nelía anmiyaqui huan amo anmechaxilía nopa tlali, huajca monequi xitlejcooca campa nochi nopa cuame catli iniaxca ferezeos huan refaitame huan nopona xitlatzontequica huan ximoaxcatica.

¹⁶Huan iteipan ixhuihua José tlananquihuijque:

—Niyon nopa hueyi cuatitlamitl amo techaxilis. Huan nochi nopa cananeos catli itztoque campa tlamayamitl quiipiyaj tepos carros para tlahuilanase. Huan nojquiya quiipiyaj tepos carros catli itztoque ipan Bet Seán huan ipilaltepertzitzi huan catli itztoque ipan tlamayamitl Jezreel.

¹⁷Huajca Josué quinnanquili ininteipan ixhuihua Efraín huan Manasés huan quinilhui:

—Anmiyaqui huan anquiipiyaj miyac chicahualistli. Amo san anquiselise se piltlaltzi, ¹⁸pero nojquiya anmoaxcatise nopa hueyi cuatitlamitl. Xitlatzontequica hasta campa inepa ica norte. Masque nopa cananeos quiipiyaj tepos carros huan neltequite, nijmatí anhuelise anquintojtoacase.

Quenicatza quixelojque nopa tlali catli mocajqui

18 Huan quema tlantoyaj quixelojque nopa tlali, nochi israelitame mosentilijque nechca altepetl Silo para quiquetzase nopa yoyon tiopamitl campa TOTECO mopantiyaya ininhuaya. ²Huan masque nopa israelitame quipixque tequiticayotl ipan nochi nopa tlali, masehualme ipan chicome huejhueyi familias ayaamo quiselijtoyaj inintlal.

³Huajca Josué quinilhui nopa israelitame: “¿Hasta quema huelis anquichiyase para anmoaxcatise nopa tlali catli anmechmacatoc TOTECO Dios yaya, catli

quitequipanojque amotatahua? 4-5 Nopa hueyi familia Judá ya qui piya itlal ica sur huan iteipan ixhuihua José ya qui piyaj inintlal ica norte. Pero monequi sesen nopa chicome huejhueyi familias catli aya-mo quiselijoque inintlal ma quintlapejpenica eyi tlacame huan nechtitlanilise. Huan na niquintitlanis ipan nopa tlali catli polihui timoaxcatise. Huan injuanti quicotonase nopa tlali ica chicome tlacotomtl. Huan quitlachilijtinemise nopa tlali, 6 huan quichihuase se iixcopinca tlen nopa tlali huan quiijcuilose inepa nopa tlali catli quinequij quiselise huan nechhualiquilise. Huan nijtlalis iixpa TOTECO Dios huan nimahuiltis ica nopa piltetzitzi para niqitas ajqueya quiselis sesen tlali. 7 Pero iteipan ixhuihua Leví amo qui piyase se tlali catli quintocaros pampa quintocarohua quitequipanose TOTECO quen totajtztzi para quiselise nopa tlacajcahualistli huan ya nopa elis nopa tlatiochihualistli catli TOTECO quinmaca. Huan Moisés, itequipanojca TOTECO, ya quinmactilijtoc iteipan ixhuihua Gad huan Rubén huan tlajco iteipan ixhuihua Manasés inintlal ipan seyoc inaliyo hueyatl Jordán para campa hualquisa tonati.”

8 Huajca Josué quinilhui nopa tlacame catli quintlapejpenijtoyaj: “Xipanotinemica ipan nochi nopa tlali huan xiquixcopinaca ipan se amatl huan xiquijcuiloca quenicatza ihuexca. Teipa techhualiquilica, huan nimahuiltis iixpa TOTECO nica ipan Silo para ma nechnextili quenicatza ma nimechmactilis sese amojuanti catli anmechtocaros.”

9 Huajca nopa tlacame quitlachilijtineneque nopa tlali huan quitamachijque huan quicotonque ica chicome tlacotomtl. Huan tlajcuilojque sese altepetl catli eltoya ipan sese tlacotomtl. Huan teipa sempa yajque campa Josué itztoya ipan Silo. 10 Huan Josué mahuilti ica piltetzitzi iixpa TOTECO para quimatis ajqueya quiselis sesen tlali. Huan quen TOTECO quinnextili, quinmajmactili inintlal sesen hueyi familia tlen nopa israelitame, huan ihuexca inintlal elqui quen imiyaca ininfamilias.

Inintlal iteipan ixhuihua Benjamín

11 Huan ajsic hora para mahuiltis para quimatis catlique tlali elis iniaxca iteipan ixhuihua Benjamín. Huan quintocaros se tlali catli mocajqui tlatlajco inintlal iteipan ixhuihua Judá huan José.

12 Ininnepa benjaminitame ica norte pejqui ica hueyatl Jordán campa hualquisa tonati, huan yajqui para campa temo tonati huan ica norte quixcotona altepetl Jericó, huan teipa panoc ipan nopa tepeme hasta ajsic nopa huactoc tlali nechca altepetl Bet Avén. 13 Tlen nozona ininnepa sempa yajqui para altepetl Luz (o Betel) huan temoc hasta altepetl Atarot Adar ipan nopa tepeyo catli mocahua ica sur tlen altepetl Bet Horón Catli Tlatzintla.

14 Huan tlen nozona ininnepa iteipan ixhuihua Benjamín quimaca se huelta huan yohui ica sur para quiixcotonas nopa tepeme nechca Bet Horón para campa temo tonati. Teipa ajsi ipan nopa pilaltepetzi catli itoca Quiriat Bal (catli nojquiya itoca Quiriat Jearim) huan eltoya se altepetl catli iniaxca iteipan ixhuihua Judá. Ya ni ininnepa Benjamín ica campa temo tonati.

15 Huan ininnepa benjaminitame ica sur pehua ica Quiriat Jearim huan yohui para campa temo tonati hasta campa nopa ameli itoca Neftoa. 16 Teipa ininnepa yohui hasta itzintla nopa tepetl catli mocahua ica norte tlen nopa Tlamayamitl Refaim campa pehua nopa Tlamayamitl Hinom. Huan teipa ininnepa benjaminitame yohui más ica sur ipan nopa Tlamayamitl Hinom huan pano ica sur hasta nopa tlaixtemolis tlen nopa altepetl catli ama itoca Jerusalén huan teipa yohui más ica sur hasta nopa ameli Rogel. 17 Teipa ininnepa benjaminitame quimaca huelta huan yohui ica norte hasta En Semes huan teipa hasta Gelilot catli mocahua iixmelac nopa tlaixtlejcolis para Adumín. Teipa temo más ica sur hasta nopa tetl catli itoca Bohán. (Bohán elqui icone Rubén catli huejcajya itztoya.) 18 Teipa ininnepa pano ica norte iteno

nopa tlamayamitl nechca hueyatl Jordán huan teipa quitoquili nopa tlaixtemolis hasta nopa tlamayamitl itoca Arabá. ¹⁹Teipa innepa iteipan ixhuihua Benjamín ica sur pano Bet Hogla ica norte huan ajsi hasta campa hueyatl Jordán calaquí ipan nopa Hueyi Atl Mictoc ica norte.

²⁰Huan innepa benjaminítame ica campa hualquisa tonati eltoc hueyatl Jordán.

Huajca nochi ya ni techilhujtoci nochi innepa nopa tlali catli iteipan ixhuihua Benjamín quiselijque ica nochi ininfamilias.

Inintlal iteipan ixhuihua Benjamín

²¹Huan nojquiya quiselijque iteipan ixhuihua Benjamín ni altepeme quen inniyaca ininfamilias. Quiselijque:

Jericó, Bet Hogla, Casis, ²²Bet Arabá, Zemaraim, Betel, ²³Avim, Pará, Ofra, ²⁴Quefar Haamoni, Ofni, huan Geba. Huajca 12 altepeme huan innipilaltepertzitzi.

²⁵Nojquiya quiselijque Gabaón, Ramá, Beerot, ²⁶Mizpa, Cafira, Mozah, ²⁷Requem, Irpeel, Tarala, ²⁸Zela, Elef, Jebús (catli nojquiya itoca Jerusalén), Gabaa huan Quiriat. Mochijque 14 altepeme huan iyoca nochi innipilaltepertzitzi.

Nochi ya ni quintocaró iteipan ixhuihua Benjamín ica nochi ininfamilias.

Inintlal iteipan ixhuihua Simeón

19 Huan ica ompa mahuilti Josué ica piltetzitzi iixpa TOTECO, huan quinnexitli catlique tlali ma quimaca nopa hueyi familia Simeón ica ihuexca quen imiyaca ininfamilias. Huan quiselijque tlali ipan inintlal iteipan ixhuihua Judá. ²Catli iteipan ixhuihua Simeón quiselijque elqui nochi ni altepeme ica nochi innipilaltepertzitzi:

Beer Seba, Seba, Molada, ³Hazar Sual, Bala, Ezem, ⁴Eltolad, Betul, Horma, ⁵Siclag, Bet Marcabot, Hazar Susa, ⁶Bet Lebaot huan Saruhén. Huajca mo-

chijqui 13 altepeme ica innipilaltepertzitzi.

⁷Huan quiselijque Aín, Rimón, Eter huan Asán, nahui altepeme huan innipilaltepertzitzi. ⁸Huan iteipan ixhuihua Simeón quiselijque nochi ni altepeme catli más mocajqui ica sur quen altepetl Baalat Beer (catli nojquiya itoca Ramat) catli eltoc ipan nopa Neguev.

Nochi ya ni quiselijque iteipan ixhuihua Simeón ica ihuexca quen imiyaca ininfamilias. ⁹Nopa tlali catli quinnacaque, quiquixtilijque tlen nopa tlali catli quiselijtoyaj iteipan ixhuihua Judá pampa onpano hueyi para inijuanti.

Inintlal iteipan ixhuihua Zabulón

¹⁰Huan ica expa mahuilti ica piltetzitzi iixpa TOTECO, huan quinnexitli catlique tlali ma quimaca nopa hueyi familia Zabulón ica ihuexca quen imiyaca ininfamilias.

Huan innepa iteipan ixhuihua Zabulón ajsic ica sur hasta altepetl Sarid, ¹¹huan tlen Sarid yajqui para campa temo tonati hasta Marala huan hasta Dabeset huan teipa ajsic nopa pilatlajtzi nechca Joneam. ¹²Huan tlen Sarid innepa iteipan ixhuihua Zabulón yajqui para campa hualquisa tonati hasta campa monepantía ica Quislot Tabor huan teipa ajsic altepetl Daberat huan tlejco hasta altepetl Jafía. ¹³Teipa yohui para campa hualquisa tonati hasta altepeme Gat Hefer, Ita Cazín huan Rimón. Huan teipa quichihua se huelta para yas altepetl Nea. ¹⁴Ica norte innepa iteipan ixhuihua Zabulón yohui hasta altepetl Hanatón, huan ontlami ica nopa tlamayamitl catli itoca Jefe El. ¹⁵Huan ipan nopa tlali iteipan ixhuihua Zabulón nojquiya quiselijque ni altepeme: Catat, Naalal, Simrón, Idala, huan Belén ihuaya nochi innipilaltepertzitzi. Huajca ica nopa sequinoc elqui 12 altepeme.

¹⁶Huajca ya ni elqui catli quiselijque iteipan ixhuihua Zabulón huan ihuexca inintlal elqui quen imiyaca ininfamilias.

Inintlal iteipan ixhuihua Isacar

17 Huan ica najpa mahuilti Josué ica piltetzitzi iixpa TOTECO, huan quinextili catlique tlali ma quinmaca iteipan ixhuihua Isacar ica ihuexca quen imiyaca ininfamilias. 18 Huan ipan nopa tlali catli quiselijque iteipan ixhuihua Isacar quipixqui ni 16 altepeme ica ininpilaltepertzitzi:

Jezreel, Quesulot, Sunem, 19 Hafaraim, Sihón, Anaharat, 20 Rabit, Quisión, Abez, 21 Remet, En Ganim, En Hada huan Betpases. 22 Huan innepa Isacar ajsic hasta altepeme Tabor, Sahazima huan Bet Semes, huan ontlami ipan hueyatl Jordán.

23 Nochi ya ni quiselijque iteipan ixhuihua Isacar huan ininfamilias catli pejqe ica ininhuejcapan tatahua.

Inintlal iteipan ixhuihua Aser

24 Huan ica macuilpa mahuilti Josué ica piltetzitzi iixpa TOTECO, huan quinexti catlique tlali ma quinmaca iteipan ixhuihua Aser ica ihuexca inintlal quen imiyaca ininfamilias. 25 Huan inintlal quipixqui ni altepeme:

Helcat, Halí, Betén, Acsaf, 26 Alamelec, Amad huan Miseal ipan innepa ica sur. Huan innepa para campa temo tonati onajsi hasta altepetl Carmelo huan Sihor Libnat. 27 Innepa ica campa hualquisa tonati yohui tlen altepetl Betdagón hasta quinamiquiyaya itlal Zabulón huan quiajsic nopa tlamayamitl Jefte El, huan teipa panoc ica norte hasta Bet Emec, Neiel, huan hasta Cabul, 28 Hebrón, Rehob, Hamón, Caná huan hasta Sidón catli hueyi. 29 Teipa innepa quimacac huela hasta altepeme Ramá huan Tiro, nopa altepetl ica se hueyi tepamitl. Huan teipa innepa ajsic ipan nopa Hueyi Atl Mediterráneo ipan altepetl Hosa. Ni tlali nojquiya quipixqui Aczib, 30 Uma, Afec huan Rehob.

31 Huajca ni tlali quipixqui 22 altepeme ica nochi ininpilaltepertzitzi huan quiselijque iteipan ixhuihua Aser huan ihuexca inintlal elqui quen imiyaca ininfamilias.

Inintlal iteipan ixhuihua Neftalí

32 Huan ipan nopa chucuasempa huela mahuilti Josué ica piltetzitzi iixpa TOTECO, quinextili catlique tlali ma quinmaca iteipan ixhuihua Neftalí ica ihuexca quen imiyaca ininfamilias.

33 Huan innepa pejqui ica altepetl Helef ipan nopa hueyi ahua cuahuil nechca Alón Saanim huan yajqui Adami Neceb, Jabneel, Lacum, huan onquisa ipan hueyatl Jordán. 34 Teipa nopa nepamitl yajqui para campa temo tonati huan panoc Aznot Tabor huan yajqui hasta Hucoc. Huan monepantiyaya ica sur ica inintlal iteipan ixhuihua Zabulón, huan monepantiyaya ica inintlal iteipan ixhuihua Aser ica campa temo tonati. Huan hueyatl Jordán eliyaya inepa para campa hualquisa tonati. 35 Huan nopa altepeme catli quinyahualtactoque ica tepamitl elqui Sidim, Zer, Hamat, Racat, Cineret, 36 Adama, Ramá, Hazor, 37 Cedec, Edrei, En Hazor, 38 Irón, Migdal El, Horem, Bet Anat huan Bet Semes. Huajca inintlal quipixqui 19 altepeme ica nochi ininpilaltepertzitzi.

39 Nochi ni altepeme ica nochi ininpilaltepertzitzi quiselijque iteipan ixhuihua Neftalí ica nochi ininhuejhueyi familias.

Inintlal iteipan ixhuihua Dan

40 Huan ica chicompa, mahuilti Josué ica piltetzitzi iixpa TOTECO, huan quinextili catlique tlali ma quinmaca iteipan ixhuihua Dan quen imiyaca ininfamilias. Huajca iteipan ixhuihua Dan quiselijque ni altepeme:

41 Zora, Estaol, Ir Semes, 42 Saalabín, Ajalón, Jetla, 43 Elón, Timnat, Ecrón, 44 Elteque, Gibetón, Baalat, 45 Jehud, Bene Berac, Gat Rimón, 46 Mejarcón, Racón huan nojquiya nopa tlali catli eltoc nechca Jope.

47 Pero iteipan ixhuihua Dan noja amo moaxcatijtoyaj nochi nopa tlali catli quintocaró. Huajca tlejcoque huan quinhuilanque catli itzttoyaj ipan tlali Lesem huan moaxcatijque huan

quintlamimictijque nopona. Huan mocajque para itztose nopona, huan teipa quitocaxtijque Lesem, Dan, quen itoca ininhuejcapan tata.

⁴⁸Huajca nochi ni altepeme ica nochi ininpaltepehua quintocaró iteipan ixhuhua Dan huan ihuexca inintlal elqui quen imiyaca ininfamilias.

Itlal iteipan ixhuhua Josué

⁴⁹Huan nopa israelitame tlanque quixelohuaj nopa tlali ica nopa 12 huejhueyi familias. Huan teipa iyoca quimactilijque se tlali Josué para iaxca. ⁵⁰Huan quen TOTECO quijto, quimacaque Josué catli tlajtlanisquía. Huajca Josué tlajtlanqui ma quimacaca altepetl Timnat Sera campa tepeyo ipan tlali Efraín. Huan quimacaque. Huajca Josué sempa quisencajqui nopa altepetl huan nopona mocajqui para itztos.

⁵¹Huajca elqui nopa totajtzi Eleazar, Josué huan nochi israelita tlayacanani catli mahuiltijque ica piltetzitzi iixpa TOTECO nechca altepetl Silo huan quinmajmactilijque nopa tlali ica nopa huejhueyi familias. Huan mahuiltijque calixpa campa calaquij ipan nopa yoyon tiopamitl campa TOTECO mopantiyaya Ininhuaya. Huan tlanque quixelohuaj nopa tlali.

Altepeme campa hueli momanahuse

(Nm. 35:6-34; Dt. 4:41-43; 19:1-13)

20 Teipa TOTECO quinojnotzqui Josué huan quiilhui: ²“Xiquinilhui nopa israelitame ma quitlapejpenica sequin altepeme catli anquintocaxtise ‘altepeme campa hueli momanahuse’ quen achihuiya nijnahuatí Moisés. ³Quej nopa sintla se masehualí quimictis seyoc, masque amo quinequiyaya quimictis, huelis momanahuiti ipan se tlen nopa altepeme huan nopona amo aquí huelis quimictis para momacuepas ica catli quichijtoc.

⁴“Huan quema se tlatatl ajsiti para momanahuis ipan se altepetl, monequi yas campa ipuerta nopa altepetl campa itztoque nopa huehue tlacame huan quinpohuilis nochi catli panotoc. Huan nopa tlayacanani huelis quiselise ipan

nopa altepetl huan quimacase campa itztos. ⁵Huan sintla se quitoquilis catli quinequi quicuepilise ica catli quichijtoc, amo hueli quitemactilise. Monequi quimanahuse pampa san panoc, amo quinequiyaya temictis huan amo quipiyaya cualantli ihuaya catli mijqui. ⁶Huan nopa tlatatl catli temicti monequi mocahuas ipan nopa altepetl hasta quinextis iniixpa se juez huan nopa masehualme nopona para tlen amo itlajtlacol catli panoc, huan inijuanti nojquiya quijtose para amo itlajtlacol. Huan quema ya quitlajtolsencajtoque teipa mocahuas nopona hasta miquis nopa totajtzi catli más hueyi. Huan teipa, quena, nopa temictijquetl huelis mocuepas ichaj ipan ialtepe campa quistejqui.”

⁷Huajca nopa israelitame quitlapejpenijque chicuase altepeme. Quintlapejpeni eyi ipan ni inaliyo para campa temo tonati huan eyi ipan ne seyoc inaliyo hueyatl Jordán para campa hualquisa tonati. Campa temo tonati quitlapejpenijque Cedes ica norte ipan tlali Galilea ipan nopa tepeyo ipan itlal Nefthalí, huan altepetl Siquem ipan tepeyo ipan itlal Efraín huan altepetl Quiriat Arba (catli nojquiya itoca Hebrón) ipan nopa tepeyo ipan itlal Judá. ⁸Huan ipan neca inaliyo hueyatl Jordán para campa hualquisa tonati quitlapejpenijque altepetl Berser ipan huactoc tlali ipan itlal Rubén, huan altepetl Ramot tlen tlali Galaad ipan itlal Gad huan altepetl Golán ipan tlali Basán catli ama inintlal tlajco iteipan ixhuhua Manasés. ⁹Huajca ni altepeme quintocaxtijque “altepeme campa hueli momanahuse”. Quiiyocatlalijque para israelitame huan para nopa seyoc tlali ehuaní catli itztoyaj ininhuaya ma ipan momanahuica sintla temictise masque amo quinequiyayaj. Huan se temictijquetl motlatis ipan se tlen ni altepeme para iteiximatcahua nopa mijcatzi catli quintocarohua quicuepilise amo huelise quicuepilise hasta moquetzas nopona iixpa nopa juez huan nopa masehualme para ma quitlajtolsencahuaca sintla nelía quinequiyaya quimictis o amo.

Inialtepehua iteipan ixhuihua Leví

(1 Cr. 6:54-81)

21 Huan nopa tlayacanani tlen iteipan ixhuihua Leví yajque quitatoj nopa totajtzi Eleazar, ihuaya Josué huan nochi ne sequinoc tlayacanani ipan nochi huejhueyi familias tlen israelitame. **2**Huan quincamanalhuijque nepa ipan Silo ipan tlali Canaán huan quinilhuijque: “TOTECO quinahuati Moisés ma techmac-tili altepeme campa tittzose huan poteros campa tlacuase totlapiyalhua.” **3**Huajca nopa israelitame quineltoaque catli TOTECO tlanahuatijtoya huan sesen hueyi familia quimacac nopa levitame sequin altepeme ica ininpotroses ipan inintlal.

4Leví huejcaya quinpixqui eyi itelpocahua: Coat, Gersón huan Merari. Huan achtihui mahuiltijque ica piltetzitzi para quimatise catlique quiselise iteipan ixhuihua Coat catli inintoca eliyaya coatitame. Huan nopa coatitame catli nojquiya itztoyaj iteipan ixhuihua Aarón, se iteipan ixhui Coat, injuanti quiselijque **13** altepeme ipan nopa tlalme catli iniaxca iteipan ixhuihua Judá, Simeón huan Benjamín. **5**Pero nopa sequinoc coatitame catli amo elque iteipan ixhuihua Aarón quiselijque majtclactli altepeme ipan nopa tlalme catli iniaxca iteipan ixhuihua Efraín, Dan huan nopa tlajco iteipan ixhuihua Manasés.

6Teipa mahuiltijque ica piltetzitzi para quimatise catlique quiselise iteipan ixhuihua Gersón, huan quiselijque **13** altepeme ipan nopa tlalme catli iniaxca iteipan ixhuihua Isacar, Aser, Neftalí huan ne seyoc tlajco iteipan ixhuihua Manasés catli mocajque nopa seyoc inaliyo Jordán ipan tlali Basán.

7Huan sempa mahuiltijque ica piltetzitzi para quimatise catlique quiselise iteipan ixhuihua Merari. Huan quiselijque **12** altepeme ipan nopa tlalme catli iniaxca iteipan ixhuihua Gad huan Zabulón.

8Huajca quen tenextili nopa piltetzitzi, nopa israelitame quimactilijque iteipan ixhuihua Leví altepeme huan potroses para inintlapiyalhua quen TOTECO quinahuatijtoya Moisés.

9-10Huajca nopa piltetzitzi quinexti para coatitame catli iteipan ixhuihua Aarón ach-

tihui ma quiselica inialtepehua. Huajca iteipan ixhuihua Judá huan Simeón quiiyocatlalijque altepeme para quimacase.

11Huan quinqmacaque Quiriat Arba ica nochi ipotroses ipan nopa tepeyo ipan itlal Judá. Nopa altepetl quipixqui itoca Arba pampa Arba elqui itata Anac huan nopa altepetl nojquiya itoca eliyaya Hebrón. **12**Pero nopa milme catli mocajqui más huejca tlen nopa altepetl huan ipilaltepetzitzi quimacaque Caleb, icone Jefone.

13Huan Hebrón nojquiya quiselijque iteipan ixhuihua Aarón huan eliyaya se altepetl campa hueli momanahuisse para ipan momanahuisse se tlatcatli cactli temictijtoya.

Huan nojquiya iteipan ixhuihua Aarón quiselijque Libna, **14**Jatir, Estemoa, **15**Holón, Debir, **16**Aín, Juta, huan Bet Semes ica nochi ininpotroses. Huajca nopa huejhueyi familias Judá huan Simeón quimactilijque iteipan ixhuihua Leví chicnahui altepeme.

17Huan nopa hueyi familia Benjamín quimactilijque nahui altepeme huan ininpotroses: Gabaón, Geba, **18**Anatot huan Almón.

19Huajca ica nochi iteipan ixhuihua Aarón quiselijque **13** altepeme ica ininpotroses.

20Huan nica eltoc inintoca nopa nahui altepeme ica ininpotroses catli nopa hueyi familia Efraín quimacac nopa sequinoc levitame catli itztoyaj iteipan ixhuihua Coat pero amo hualajque ipan Aarón teipa.

21Quiselijque Siquem ipan nopa tepeyo ipan itlal Efraín catli nojquiya eliyaya se altepetl campa hueli momanahuisse. Huan quiselijque Gezer, **22**Kibsaím huan Bet Horón ica ininpotroses.

23Huan nopa hueyi familia Dan quimacac nahui altepeme ica ininpotroses: Elteque, Gibetón, **24**Ajalón huan Gat Rimón.

25Huan nopa tlajco hueyi familia Manasés ica campa temo tonati quinqmacaque ome altepeme ica ininpotroses: Taanac huan Gat Rimón.

26 Huajca para nochi ne sequinoc coatitame quiselijque majtlactli altepeme ica ininpotreros.

27 Huan nopa levitame catli hualajque ipan icone Leví catli itoca eliyaya Gersón quiselijque ni altepeme:

Nopa tlajco tlen nopa hueyi familia Manasés catli itztoque ica campa hualquisa tonati quiselijque ome altepeme ica ininpotreros: Golán ipan tlali Basán, se altepetl campa hueli momanahuise, huan Beestera.

28 Tlen nopa hueyi familia Isacar quinselijque nahui altepeme ica ininpotreros: Cisón, Dabarat, 29 Jarmut huan En Ganim.

30 Tlen nopa hueyi familia Aser quinselijque nahui altepeme ica ininpotreros: Míseal, Abdón, 31 Helcat huan Rehob.

32 Tlen nopa hueyi familia Neftalí quinselijque eyi altepeme ica ininpotreros: Cedés, se para ipan momanahuise ipan tlali Galilea, huan Hamot Dor huan Cartán. 33 Huajca ica nochi nopa gersonitame quinselijque 13 altepeme ica ininpotreros.

34 Huan nopa levitame catli hualajque tlen icone Leví catli itoca Merari quiselijque ni altepeme:

Tlen nopa hueyi familia Zabulón quinselijque nahui altepeme ica ininpotreros: Jocneam, Carta, 35 Dimna huan Naalal.

36 Tlen nopa hueyi familia Rubén quinselijque nahui altepeme ica ininpotreros: Beser, Jahaza, 37 Cademot huan Mefaat.

38 Tlen nopa hueyi familia Gad quinselijque nahui altepeme ica ininpotreros: Galaad, se altepetl campa hueli momanahuise, huan Mahanaim, 39 Hesbón huan Jazer.

40 Huajca ica nochi iteipán ixhuihua Leví catli hualajque ipan icone Merari huejcayja quiselijque 12 altepeme.

41 Huan nochi iteipán ixhuihua Leví san sejco quiselijque 48 altepeme, 42 huan sese altepetl quipixqui ipotreros.

TOTECO quichihua catli quijtohua

43 Huajca TOTECO quinmactili nopa israelitame nochi nopa tlali catli ininhuaya

mocajqui ininhuejcapan tatahua para quinmacasquía. Huan nopa israelitame nozona mocajque para itztose. 44 Huan TOTECO quinmacac tlasehuilistli quen quijto. Huan amo aquí huelqui ininhuaya motlalis para quinhuilanas pampa TOTECO quinmacac chicahualistli para ma quintlanica nochi inincualancaitacahua. 45 Nochi nopa cuali tlamantli catli TOTECO quinilhui quinmacasquía, nochi quinmactili.

Mocuepque ininchajchaj nopa soldados tlen seyoc inaliyo Jordán

22 Huan Josué quinsentili nopa soldados catli hualajque ipan nopa hueyhueyi familias Rubén, Gad huan ne tlajco iteipán ixhuihua Manasés catli mocajque campa hualquisa tonati, 2 huan quinilhui: “Anquineltoaque nochi catli TOTECO quinahuati Moisés xijchihuaca. Huan nochi catli na nimechilhujtoc, anquichijtoque. 3 Amo anquintlahuelcajtoque amoicnihua masque miyac tonali titlahuilantoque. Anquichijtoque nochi catli amoTECO Dios anmechnahuatijtoc. 4 Ama amoTECO Dios techpalehujtoc ma titlatlanica huan techmacatoc tojuanti catli tiamoicnihua, tlasehuilistli quen techilhui. Huajca ama sempa huelis anyase amochajchaj huan amoltepehua ipan ne seyoc inaliyo hueyatl Jordán para campa hualquisa tonati campa Moisés itequipanojca TOTECO anmechmactili amotlal. 5 San ximomocuitlahuica para xijchihuaca senquistoc nochi nopa tlanahuatili catli Moisés anmechmacac. Xiquicnelica TOTECO Dios huan xinemica ipan iojhui. Xijneltoquílca nochi itlanahuatilhua huan san ya xijhueyichihuaca. Xijtequipanoca ica nochi amoyolo huan ica nochi amotonaltzi.”

6-7 Huan Moisés quinmactilijtoya tlajco iteipán ixhuihua Manasés nopa tlali Basán campa hualquisa tonati, pero ne seyoc tlajco iteipán ixhuihua Manasés quiselijque tlali catli Josué quinmacac para campa temo tonati. Huan Josué quintiochijqui huan monahuatijque, 8 huan quinilhui: “Sempa xiyaca amochajchaj ica nochi amoricojyo catli anquiltantoque tlen to-

cualancaitacahua. Anquinpiyaj tlahuel miyac tlapiyalme, plata, oro, bronce huan yoyomitl. Huajca quema anajsise, xiquinmajmacatij amoicnihua ipan amotlal.”

⁹Huajca nopa soldados catli itzttoyaj iteipan ixhuihua Rubén, Gad huan tlajco iteipan ixhuihua Manasés quincajteque nopa sequinoc israelitame ipan Silo ipan tlali Canaán. Huan quiixcotonque hueyatl Jordán huan sempa yajque ipan nopa tlali catli TOTECO quiilhujtoyaya Moisés ma quinmacaca.

Nopa tlaixpamitl nechca hueyatl Jordán

¹⁰Pero ipan ojtli quema noja itzttoyaj ipan tlali Canaán huan quinechcahuiyayaj iteno hueyatl Jordán para quiixcotonase, nopa soldados catli itzttoyaj iteipan ixhuihua Rubén, Gad huan tlajco iteipan ixhuihua Manasés quiquetzque se tlaixpamitl catli nelía hueyi. ¹¹Huan quema nopa israelitame campá temo tonatí quicajque para iteipan ixhuihua Rubén, Gad huan Manasés quiquetztoyaj se tlaixpamitl ipan inepa Canaán nechca hueyatl Jordán, ¹²mosentilijque nochi nozona altepetl Silo para quinhuilanaj. ¹³⁻¹⁴Pero achtihui quititlanque Finees, icone totajtzi Eleazar, ica majtactli huejhueyi tlayacanani, se tlayacanquetl tlen sesen hueyi familia catli mocahuayayaj ipan nopa tlali campá temo tonatí. Huan ajsique campá itzttoyaj iteipan ixhuihua Rubén, Gad huan tlajco iteipan ixhuihua Manasés nozona ipan tlali Galaad. ¹⁵Huan quema ajsitoj ipan tlali Galaad, quinilhujque:

¹⁶—Nochi israelitame catli quitlepanitaj TOTECO techtitlantoque ma timechtlatzintozquiliqij: ‘¿Para tlen quej ni antlajtlacolchihuaj iixpa TOTECO Dios catli tiisraelitame tijtequipanohuaj huan amoiyocacahuaj para amo anquinelto case tohuaya? Anquichijtoque se tlaixpamitl para ma nesí ayacmo anquitlepanitaj TOTECO. ¹⁷¿Amo anquielnamiquij nopa tlajtlacoli catli sequin tlacame quichijque ipan Peor quema quinhueyichijque nopa tlaixcopincayome, huan TOTECO techtlatzacuiliti ica se hueyi cocolistli? Huan hasta ama nopa tlajtlacoli noja techcocolhua.

¹⁸Huan ama amojuantí ¿nojquiya anquineltoque anmoyocatlalise huan anmoyoltetilise ica TOTECO? Huan sintla anmotzon-tetilíaj iixpa ama, mostla yaya cualanis ica nochi tiisraelitame. ¹⁹Huan sintla amo anhuelij anquihueyichihuase TOTECO nozona ipan ne inaliyo Jordán para campá hualquisá tonatí pampá anquijitaj amo tlapajactli iixpa TOTECO nopa tlali catli anquiselijque, huajca xipanoca hasta ne se yoc inaliyo ni hueyatl campá TOTECO itztoc tohuaya ipan iyoyon tiopa huan timechmacase tlali campá tojuanti. Pero amo ximotzontetilica ica TOTECO niyon ica tojuanti. Amo xijquetzaca se tlaixpamitl para se yoc tecojtli catli amo TOTECO Dios catli ya quiipya itlaixpa. ²⁰¿Amo anquielnamiquij quema Acán, icone Zera, tlajtlacolchijqui iixpa TOTECO huan mocuili catli quitelchijtoyaya TOTECO, huan TOTECO techtitlanili miyac tlatzacuiliti nochi tiisraelitame? Amo san mijqui Acán, pero mijque miyaqui israelitame ica itlajtlacol.’

Quichijque nopa tlaixpamitl pampa quiicnelíaj TOTECO

²¹Huajca iteipan ixhuihua Rubén, Gad huan tlajco iteipan ixhuihua Manasés quinnanquiliqijque nopa tlayacanani tlen nopa huejhueyi familias tlen israelitame huan quinilhujque:

²²—TOTECO yaya catli quiipya nochi chicahualistli. Yaya catli quinnahuatía nochi catli sequinoc quintocaxtíaj dioses. San yaya TOTECO. Yaya quimati para melahuac tocananal, huan xijmatica nochi amojuantí nojquiya. Tijtestigojquetzaj TOTECO para amo tijchijtoque ni tlaixpamitl para timoiyocatlalise huan timoyoltetilise. ²³Niyon amo tijchijtoque para tijcajtehuase TOTECO o para ipan tijmacase tla-cajcualistli tlatlatili o tlen harina, o para onca tlayotlatlali ihuaya. Sintla quej nopa, huajca amantzi ma techtlatzacuiliti TOTECO. ²⁴Pero tijchijque pampá tiquicnelíaj. Timoiilhujque huelis mostla o huiptla amoteipan ixhuihua quinilhise toteipan ixhuihua para amo quiipiyaj tlanahuatili para yase quihueyichihuaj TOTECO Dios

catli tiisraelitame tijtequipanohuaj amohuaya nopona ipan amotlal. Huelis quinilhuse toteipan ixhuihua para amo tleno quipiyaj amohuaya. ²⁵Huelis moilhuse para TOTECO quitlalijtoc ni hueyatl Jordán para techiyocacahuase huan quinilhuse toteipan ixhuihua tlen tohuejhueyi familias Rubén, Gad huan tlajco ifamilia Manasés para amo tleno tijpiyaj ica TOTECO. Huan quej nopa amoteipan ixhuihua quinchihuase toteipan ixhuihua ma ayacmo quitlepanitaca TOTECO.

²⁶“Yeca timoilhujique más cuali ma tijchihuaca se tlaixpamitl, pero amo para ipan tijtlalise o tijtencahuase tlaicajcahualistli. ²⁷¡Amo! Tijchijique nopa tlaixpamitl para ma quinelnamiquilti amoixhuihua huan toteipan ixhuihua para tojuanti nojquiya tijhueyichihuaj TOTECO. Pero san tijcahuase tlaicajcahualistli iixpa TOTECO ipan iyoyon tiopa campa amojuanti. Huan amoconehua amo huelise quinilhuse toconehua para amo quipiyaj tlanahuatili para quihueyichihuase TOTECO amohuaya. ²⁸Huan sintla amoixhuihua quej nopa quijitose, toixhuihua quinnanquilise: ‘Xiquitaca ni tlaixpamitl catli totatahua quinsencajtoque quen TOTECO itlaixpa, pero amo quichijique para tlaicajcahualistli tlatlatili. San quinsencajque para technextilis para amojuanti huan tojuanti san se tiitztoque.’

²⁹“Ma amo quema timoilhucia para timohuejcatlalise tlen TOTECO. Amo quema timohuejcatchihuase tlen ya, o tijchihuase se tlaixpamitl para tojuanti totlacajcahualis, niyon para tlaicajcahualistli tlatlatili, niyon tlaicajcahualistli tlen harina, niyon catli onca. Pampa tijmatij san nopa tlaixpamitl catli eltoc ipan iyoyon tiopa TOTECO Dios yaya mocahua tohuaya tiisraelitame quinamiqui para tlaicajcahualistli.”

Quej nopa quijitoque.

³⁰Huajca quema nopa totajtzi Finees huan nopa tlayacanani tlen nopa huejhueyi familias tlen israelitame quicajque catli nopa soldados tlen Rubén, Gad, huan tlajco familia Manasés quijitoque, nelía pajque. ³¹Huan nopa totajtzi Finees quinilhui:

—Ama tijmatij temachtli TOTECO itztoque ica nochi tojuanti pampa tiquitaj amo antlajtlacolchijtoque iixpa ya. Huan yeca antechijcuenilijtoque se hueyi tlatzacuiltli catli hueltosquía techajsitosquía.

³²Teipa Finees catli elqui icona nopa totajtzi Eleazar ininhuaya nopa sequinoc tlayacanani, quincajteque nopa soldados tlen Rubén, Gad huan tlajco nopa familia Manasés ipan tlali Galaad huan sempa yajque ipan tlali Canaán, huan quinpothulijque nopa israelitame nochi catli panotoya. ³³Huan nochi nopa israelitame nopona pajque miyac ica catli quijitoque, huan quicualitaque catli panotoya. Huan nopa israelitame quihueyichijque Toteco Dios, huan ayacmo moilhujique para quinhuilanati inicnihua huan quiseamanatij nopa tlali campa itztoque iteipan ixhuihua Rubén huan Gad. ³⁴Huajca iteipan ixhuihua Rubén huan Gad quitocaxtlalijque nopa tlaixpamitl: “Nopa tlaixpamitl catli techelnamiquiltis.” Pampa quijitoque: “Moquetza quen se testigo para techelnamiquiltis amojuanti huan tojuanti para san TOTECO yaya DIOS.”

Itlamiya camanal Josué

23 Huajca ica miyac xihuitl TOTECO quinchijqui nopa israelitame ma quintlanica nochi inincualancaitacahua huan teipa oncac tlashuilitli ipan inintlal. Huan Josué ya eliyaya huehuentzi. ²Huajca quinnotzqui nochi jueces, huehue tlacame huan tlayacanani ipan nochi huejhueyi familias, huan nochi tequitini huan quinhui:

“Nijpiya miyac xihuitl huan ya nihuehuentzi. ³Ya anquitztoque catli TOTECO Dios quichijtoc por tojuanti ica nochi nopa masehualme catli ejque ipan ni tlali pampa TOTECO Dios tlahuilanqui por tojuanti. ⁴Huan ama ya nimechmactili ica rifa nochi tlali tlen hueyatl Jordán hasta nopa Hueyi Atl Mediterráneo campa oncalqui tonati. Nimechmactili catli timoaxcatijtoque huan nochi catli noja polihui tijtlanise. ⁵Huan yaya TOTECO Dios amoxitla quintojtocas nochi catli noja itztoque nopona. Huan quichihuas para anmoaxca-

tise nopa tlali quen yaya tohuaya mocajtoc.

6“Huajca ximoyoltetilica. Ximomocuitlahuica para anquichihuase nochi catli ijcuiljtoc ipan itlanahuatilhua Moisés. Amo ximoiyocacahuaca niyon quentzi. 7Amo tleno xijpiyaca ica injuanti catli noja mocahuaj ipan nopa tlali. Amo xiquijtoaca inintoca inintiotzitz, niyon amo xiquintestigojquetzaca inintlaixcopincayohua. Amo xiquinhueyichihuaca, niyon amo ximotlancuaquetzaca iniixpa. 8San xijtoquilijtiyaca TOTECO Dios quen anquichijtoque hasta ama.

9“Yaya TOTECO Dios quitojtocacot amoixpa miyac masehualme catli nelía tejtequite catli camanaltiyayaj miyac camanali huan itztoyaj ipan miyac huejhueyi altepeme. Huan hasta ama amo aqui huelqui anmechtiani. 10San setzi tlen amujuanti huelis quinmajmatis se mil tlacame pampa TOTECO Dios tlahuilana por amujuanti quen tohuaya mocajtoc quichihuas. 11Huajca ximomocuitlahuica para san xiquicnelica yaya TOTECO Dios.

12“Sintla anmoiycacahuase tlen TOTECO huan anmosansejcotilise ica injuanti catli noja mocahuaj ipan ni tlalme, o sintla anmosihuajtise ica iniichpocahua, o sintla anquincahuilise ma mocuilica se israelita ichpocatl, 13xijmatica para melahuac TOTECO Dios ayacmo quitojtocas tlen nopa tlalme amoixpa. ¡Amo! Huan injuanti elise quen tlaquetztl huan quichihuase xihuetzica. Anmechchihuilise quen se anmechhuitequis ipan amocuitlapa ica se lazo. Elise quen se huitztl ipan amoixteyotl catli tlahuel tecoco. Miyac anmechcuesolmacase hasta anmiqueuse huan ayacmo anitztose ipan nopa tlali catli TOTECO Dios anmechmacatoc.

14“Nechcatitoc para nimiquis quen pano ica nochi masehualme. Anquimatij ica nochi amoyoltzi huan ica nochi amotonaltzi para amo tleno polijtoc catli TOTECO Dios amohuaya mocajtoc. Nochi catli quijto quichihuasquía, yaya quichijtoc. 15Huan quen TOTECO Dios anmechtiochijtoc ica nochi nopa cuali tlamanli catli anmechtencahuili, nojquiya TOTECO Dios

anmechhualiquilis nochi nopa fiero tlamantli catli quijtojtoc panos hasta yaya anmechmictis huan ayacmo huelis anitztose ipan nopa tlali sintla amo anquitoquilise. 16Huajca sintla anquixpanose nopa camanali catli TOTECO Dios quichijqui amohuaya huan catli anmechnahuatijtoc huan anquinhueyichihuase tiotzitz o anmotlancuaquetzase iniixpa, TOTECO nelía cualanis amohuaya. Huan yaya anmechmictis huan nimantzi anmechtlamipoli-huiltis ipan ni tlali catli anmechmacatoc.”

Toteco quiompahui nopa camanali sencahuili ica israelitame

24 Teipa Josué quinsentili nochi israelitame tlen nochi huejhueyi familias ipan altepetl Siquem, ica nochi huehue tlacame, nochi tlayacanani, jueces huan tequitini. Huan nochi monextitoy iixpa Toteco Dios. 2Huan Josué quincamanalhui nopa israelitame huan quinilhui:

—Ya ni catli TOTECO Dios catli tiisraelitame tijtequipanohuaj anmechilhuiá: ‘Nelía huejcayja amohuejcapan tatahua mocahuayayaj nozona ipan seyoc inaliyo hueyatl Eufrates para campa hualquisa tonati, huan quinhueyichihuayayaj inintiotzitz quen elisquía Dios. Huan Taré, catli elqui itata Abraham huan Nacor, nojquiya ya nopa quichijque. 3Pero na nijtlapejpeni amohuejcapan tata Abraham catli itztoya ipan seyoc inaliyo hueyatl Eufrates, huan nijyacanqui campa hueli ipan tlali Canaán huan nijmacac icone, Isaac, para ipan ya niquinmiyaquilis iteipan ixhuihua. 4Huan nijmacac Isaac ome iconehua, Jacob huan Esaú. Huan nijmactili Esaú nopa tlali Seir. Huan Jacob catli nojquiya itoca Israel, huan itelpocahua catli itztoyaj amohuejcapan tatahua teipa yajque ipan tlali Egipto. 5Teipa niquintitlanqui Moisés huan Aarón huan ica injuanti, niquintitlanili miyac tlahuhijcayotl nopa tlali Egipto ehuan. Huan teipa niquinquixti 6amohuejcapan tatahua tlen tlali Egipto. Huan niquinhualicac hasta ajsitoy campa nopa Hueyi Atl Chichiltic. Huan quitoquiliyayaj nopa egiptome ica inintlahuilanca carros huan ininchahuayos. 7Pero amohuejcapan tatahua nechtzajtzilijque na,

niinintECO, para ma niquinpalehui. Huan nijchijqui ma onca se tzintlayohuilotl tlatlajco campa amotatahua huan ne egiptome. Huan nijchijqui nopa hueyi atl ma hualla ininpani nopa egiptome huan quintlamitzajqui. Huan anquimatij nochi catli niquinchihuili nopa Egipto ehuan.

“Huan teipa para miyac xihuitl anitztoyaj ipan nopa huactoc tlali campa amo tleno onca. ⁸Huan teipa nimechhualicac hasta inintlal nopa amorreos catli itztoyaj ipan ne seyoc inaliyo Jordán para campa hualquisa tonati. Huan injuanti anmechhuilanque, pero naya nimechpalehui xiquintlanica. Niquntzontlamilti amoixtla huan anmoaxca-tijque nopa tlali. ⁹Huan quema Balac, icone Zipor catli elqui inintlanahuatijca moabitame, pejque anmechhuilanasnequij anisraelitame; yaya tlanahuati ma quinoztatij Balaam, icone Beor, para ma anmechtelchihuas. ¹⁰Pero amo nijcajqui ma anmechtelchihuacqui Balaam. Nijchihualti ma anmechtiochihua miyac huelas huan quej nopa nimechmanahui tlen Balaam.

¹¹“Teipa anpanocoj hueyatl Jordán para ni seyoc anali huan anajsique altepetl Jericó. Huan nopa Jericó ehuan anmechhuilanque huan nojquiya anmechhuilanque nopa amorreos, ferezeos, cananeos, heteos, gergeseos, heveos huan jebuseos, pero naya nimechmactili amomaco. ¹²Huan niquntitlanqui miyac cuaxicojme ma anmechyacantiyaca huan quinojtojtoaque nopa ome tlanahuatiani tlen amorreos ihuaya ininmasehualhua. Naya nimechtlanili amocualancaitacahua. Amo anquintlanque ica amomachete huan amochicahualis. ¹³Huan nimechmactili tlali ipan catli amo antequitoyaj. Nimechmactili altepeme para ipan anitztose catli amo anquisencajtoyaj. Huan nimechmacac xocomeca mili para amoxocomeca huan olivo cuame para amoaceite catli ama anquitequihuáj, pero amo anquinojtoque.’ Quej nopa quijito TOTECO.”

Monequi nochipa tijtequipanose TOTECO

Huajca nojquiya Josué quinilhui:

¹⁴—Huajca ama xijtlepanitaca huan xiquicnelica TOTECO. Xijtequipanoca ica

nochi amoyolo huan ica temachili. Xiquinquixtica huan xiquinmajcahuaca nochi nopa tiotzitzi catli amohuejcapan tatahua quihueyitlepanitaque ipan seyoc inaliyo Eufrates huan ipan tlali Egipto. San TOTECO xijtequipanoca. ¹⁵Pero sintla amo anquinequij anquitequipanose TOTECO, huajca xijtlapejpenica ama ni tonal ajqueya anquitequipanose. ¿Anquinhueyichihuase nopa tiotzitzi catli amohuejcapan tatahua quintelpanitaque huejcayja ipan seyoc inaliyo nopa hueyi hueyatl o inintlaixcopincayohua nopa amorreos campa ama anitztoque? Pero xijmatica ya ni: Naya ica nochi nochampoyohua tijtequipanose san TOTECO.

¹⁶Huajca nochi nopa israelitame tlanquilijque:

—Amo quema timoiyocatlalise tlen TOTECO. Amo quema tijcahuase huan tijhueyichihuase seyoc. ¹⁷Elqui yaya TOTECO Dios catli quinquixti tohuejcapan tatahua ipan tlali Egipto campa tequipanoyaj san tlapic. Yaya catli quichijqui miyac huejhueyi tetzatl para tojuanti. Yaya catli techmocuitlahuijtoc tlen toculancaitacahua campa hueli tinentoque ipan tohueyi ojhui hasta ama. ¹⁸Yaya TOTECO catli quinojtojtoac toixpa miyac masehualme ipan miyac tlalme. Nojquiya quinojtojtoac nopa amorreos catli itztoyaj ipan ni tlali. Huajca tojuanti nojquiya tijtequipanose huan tijhueyichihuase san TOTECO Dios.

¹⁹Huajca Josué quinilhui nochi catli nozona itztoyaj:

—Amo huelis anquitequipanose TOTECO quen hueltsi, pampa yaya tlatzejtzelolitic. Huan yaya amo quijiyohuía se catli quijitohua quitequipanohua sintla nojquiya quintelpanita tiotzitzi catli amo nelía Dios. Ya nopa quicualancaita. Sintla anquilepanitaj seyoc, amo anmechtlapojpolhuis. ²⁰TOTECO nochipa itztoya cuali amohuaya, huajca amo xijcahuaca TOTECO niyon amo xijtequipanoca seyoc. Sintla quej nopa anquichihuase, yaya moyolcuepas huan anmechtlatzacuilitis hasta anmechtlamimictis.

²¹Pero nochi nopa masehualme quinanquilijque Josué:

—¡Amo quema tijchihuase! San TOTECO tijtequipanose.

22 Huajca Josué quinilhui nochi nopa miyaqui israelitame:

—Huajca ama antestigos para melahuac catli anquijtojqtoque. Anquitestigojqtoque TOTECO para anquilapejpenijtoque anquitequipanose san ya.

—Tojuanti titestigos —inijuanti tlanquilijque.

23 Huajca Josué quinilhui:

—Sintla anquipyaj tiotzitzí, nochi ximomajcahuaca. Huan ximoyolcucapaca huan xijtoquilica san TOTECO Dios catli tiisraelitame tijtequipanohuaj.

24 Huan nochi nopa israelitame quinquilijque Josué:

—San TOTECO Dios tijtequipanose huan san yaya tijneltoquilise.

25 Huajca nopa tonal nepa nechca altepetl Siquem, Josué quichijqui se camanal sencahualli ininhuaya israelitame huan TOTECO, huan quinilhui nopa tlanahuatilme huan tlamachtili catli monequi quineltocase. 26 Huan Josué quiijcuilo nochi ni tlanahuatilme catli nopa masehualme quijtojqtoque quineltocase tlen nopa Amatlapohuali tlen Iltlanahuatilhua Toteco Dios. Huan Josué tlanahuati ma quihualica se hueyi tetl huan ma quiquetzaca nopona campa nopa ahuatl nechca iyoyon tiopa TOTECO. 27 Huan Josué quinilhui nochi nopa israelitame:

—Ni tetl catli tijquetzaj nica quinextis nochi catli panotoc ama. Quen se testigo quichihua, quicajqui nochi camanali catli TOTECO techilhui, huajca sintla amo anquichihuaj quen anquijtojqtoque, yaya anmechtelhuis.

28 Huan teipa Josué quinnahuatijtejqtoque nopa israelitame huan sesen yajqui ipan itlal catli quiselijtoyaj para iniaxca.

Mijqui Josué

(Jue. 2:6-10)

29 Huan teipa mijqui Josué, icone Nun, catli itztoya itequipanojqca TOTECO. Huan quipixqui 110 xihuitl quema mijqui. 30 Huan quitojqtoque itlacayo nechca altepetl Timnat Sera, ipan tlen ya itlal catli quiseelijtoyaj ipan nopa tepeyo catli eliyaya iniaxca iteipan ixhuhua Efraín. Campa quitojqtoque mocahua ica norte tlen tepetl Gaas.

31 Huan nopa israelitame quitequipanojqtoque TOTECO nochi tonali quema noja itztoya Josué huan quema noja itztoyaj nochi nopa huehue tlacame catli quiximatque Josué huan quixittoyaj nopa huej hueyi tetzatl catli TOTECO quichijqui para nopa israelitame.

Quitlalpachojque iomiyo José

32 Huan nojquiya nopa israelitame quihualicatoyaj iomiyo José tlen tlali Egipto, huan quitojqtoque nopona nechca Siquem. Quitojqtoque ipan nopa tlali catli ininhuejcapan tata Jacob, catli huejcajya mijqui, quincohuilijtoyaj iconehua Hamor ica 100 plata tomi. (Ni tlali teipa elqui iniaxca iteipan ixhuhua José.)

Mijqui nopa totajtzi Eleazar

33 Huan nojquiya mijqui Eleazar catli elqui icone Aarón, huan quitojqtoque nechca altepetl Guebéa ipan itlal Finees catli eliyaya icone. Huan itlal elqui ipan nopa tlachiquilme catli quiselijque iteipan ixhuhua Efraín.